

Panuario

Tuud to mgo Pogpanuario

1 ¹ Soini ka mgo pogpanuario ni Solomon no anak ni David no hari to Israil. ² Soini no mgo panuario ogpakatimul to kougsoban woy ogpakasapad, woy ogpakabulig to pogsabut to mgo maraom no mgo kinagian. ³ Ogpakabulig pad soini to pog-ugpo to litos woy matul-id no daan, woy to poghimu to litos, to matuarong woy to mahusoy. ⁴ Ogbogoy soini to marodyow no pogdoromdom duon to otow no waro gindawanan, woy ogbogoy to katagaanan woy marodyow no pog-aam duon to mgo baubato pad. ⁵ Ogpamminog porom ka mgo mougsoob no mgo otow odyow to pogtimul to na-anaran dan, woy ogkatuonan to litos ka otow no duon marodyow no pogdoromdom. ⁶ Songo ogpakabulig soini no mgo kinagian to pogsabut to mgo panuario, mgo panungilingan, mgo ignangon woy mgo atukon to mgo mougsoob no mgo otow. ⁷ Ka pogkahallok duon to Magboboot ian ka binunsuran to katagaanan, di ogsawadyon to mgo angol-angol ka kougsoban woy ka pogsapad.

Baghot to Poggon-gon to Kougsoban

⁸ Anak, pamminog ka to pog-anad to amoy nu, woy doka ogkalingawi to innangon to inoy nu. ⁹ Sikan no mgo kinagian ogko-unawa to marodyow no tangkuu duon to uu nu, woy to baliog no ogpohubung to liog nu.

¹⁰ Anak ku, ko og-adyaton ka to mgo otow no ogsasao, doka ogpatugu kandan. ¹¹ Ko ognangon sikandan to “Dii kad; ogpanggopas ki to sagboka no otow odyow no ogpamali-palian ta, ogbokasan ta ka otow no waro gindawanan. ¹² Og-aboongon ta sikandin, unawa to lobonganan no og-aboong to tibon lawa to otow no ogsood. ¹³ Ogpakapurut ki to loinloin no mgo mahalon no kaaglagan, woy ogkaponu ka mgo baoy ta to mgo in-agow ta. ¹⁴ Duma ka kanami woy ogsagbokoon ta ro ka sooranan to saapi ta.” ¹⁵ Anak ku, doka ogduma kandan. Doka og-unug to mgo ogbadyaan dan, ¹⁶ hoo su ogtallong-tallong sikandan odyow to poghimu to karootan, woy og-agpas-agpas sikandan odyow to pogpalangosa. ¹⁷ Nokoy naan

ka puus to pogpanoon to mgo lit-ag tagood no ogpipitow ka mgo manuk-manuk? ¹⁸ Niggogopas do soini no mgo otow odyow ro naan to pogpatuligis to kandan do no langosa. Kandan do no lawa ka ogkatinagpaan dan! ¹⁹ Sikan ka oglopow to otow to ogpanaapi to kono'n litos no daan. Og-agow sikan to ukul to otow no ogpaka-utol to sikan no saapi.

²⁰ Nig-umow si Kougsoban duon to pagindaanan, ogmaagbot sikandin to pogkagi duon to mgo limuranan to mgo otow, ²¹ nig-umow sikandin dio to koopusan to mgo pagindaanan no moon-ing otow, woy nignangon-nangon sikandin dio to mgo gomawan to lunsud. ²² Nig-inso si Kougsoban to "Monu kaugoy no ogkoiniatan now no mgo manguod ka mgo kono'n matosan no mgo katagaanan now? Monu kaugoy no igkarago to mgo taagsuy-at ka pogtambabo dan, woy ogdomot ka mgo angol-angol to katagaanan? ²³ Ko nigpannalinga kow to pogsapad ku porom, ogbaaran ku sikaniu to goinawa ku, woy ipoitaga ku kaniu ka ogdoromdomon ku. ²⁴ Di tongod su pigsawoy a now to pog-umow ku, woy su waro otow nigsagman to pogtaruwoy ku to boad ku kaniu, ²⁵ woy su waro kow nigpannalinga to mgo tugun-tugun ku, woy waro kow nigtinawo to pogsapad ku, ²⁶ songo ognisian ku ro sikaniu ko ogkabaybadyaran kow; ogtambaboon ku sikaniu ko ogkalopowan kow to makahahallokoy. ²⁷ Oglopow ka makahahallokoy kaniu unawa to poglopow to daldaa-ot, woy ogdatong sikan unawa to alimpuus woy kono kow ogpakagoon to koirapan woy to igkisasow now. ²⁸ No og-umawon a now, di kono a ogtabak. Ogpamanghoan a now di kono kow ogpakakita kanak. ²⁹ Pigdomotan now ka katagaanan woy waro kow nig-aam to pogkahallok duon to Magboboot, ³⁰ waro kow nigtinawo to pogtugun-tugun ku, woy pigsamilian now ka pogsapad ku, ³¹ woy tongod to sikan ogkoonon now ka in-orok now, woy ogkahaantoy kow to bogas to mgo pigbabantaan now. ³² Ogkammatoy ka mgo otow no manguod to katagaanan duon to kandan no pogsuwoy-suwoy, woy ogkagugus ka mgo angol tongod to pogdakol so atoy ran, ³³ di ko hontow ka ogpamminog koddi no si Kougsoban, ogpaka-ugpo sikandin to waro igkisasow woy waro koirapan no kono og-iman-iman to igkobaybadyari rin."

Ka Igkabulig to Kougsoban

2¹ Anak, tinawaa nu ka mgo kinagian ku, woy limura nu ka mgo sugu ku duon to goinawa nu. ² pamminog ka to kougsoban, woy poomot ka to pogsabut. ³ Umowa nu woy hinggata nu ka pogsabut, ⁴ woy pamanghoa nu unawa to pogpamangho nu to saapi woy to pogpamitow nu to hinoos no bulawan. ⁵ Ko sikan ka oghimuon nu, ogkasabutan nud on ka pogkahallok duon to Magboboot woy ogkakitaan nu ka katagaanan tongod kandin. ⁶ Hoo su ka Magboboot ian ka ogbogoy to kougsoban, woy ligkat to kandin no bobo ogdatong ka katagaanan woy pogsabut. ⁷ Pighimpod to Magboboot ka karaogan to mgo matuarong woy sikandin ka kaasag duon to mgo otow no waro ikasawoy. ⁸ Pigbantadyan din ka poghipanow to mgo otow no mohusoy, woy pigkaasagan din ka daan to mgo otow no ogpanalinga kandin. ⁹ No sikan ian no ogpakasabut ka ko nokoy ka litos, ka matuarong woy ka mohusoy; ian ka tibon mgo marodyow no daan. ¹⁰ Ogsood ka kougsoban duon to goinawa nu, woy ogkarago ka ko oggoramon nu ka katagaanan. ¹¹ Ogbabantadyan ka to marodyow no pogdoromdom, woy ogkakaasagan ka to pogsabut. ¹² Ogpakalipuwat koikow ka kougsoban ligkat to mgo daan to mgo maroot no mgo otow, ian to mgo otow no kono'n matul-id to pogkagi. ¹³ Og-ongkoran to sikan no mgo otow ka matul-id no mgo daan odyow to poghipanow to kausiloman. ¹⁴ Ogkarago sikandan to poghimu to kono'n litos, woy ogkukuus sikandan tongod to bongkug no hinimuan. ¹⁵ Mgo bongkug ka mgo daan dan, woy mgo gawoy ka tibon mgo oghimuon dan. ¹⁶ Songo ogpakalipuwat koikow ka kougsoban ligkat to agkadyon no boi, ligkat to nakasuwoy no asawa no og-adyat-adyat to pogkagi. ¹⁷ Pig-ongkoran to sikan no boi ka lukos no nigduma kandin ligkat to daaga pad sikandin, woy pigbaagad din ka kasabutan no pighimu rin to tangkaan to Magboboot nokani. ¹⁸ Ka ogsood to baoy rin ogdoog to kamatadyon, woy ka oghipanow to mgo daan din ogpaka-agpot to mgo gimukud to mgo namatoy on. ¹⁹ Waro otow no oglibong ligkat kandin odyow no ogkoudyag oghutuk. ²⁰ Di sikoikow atag, oghipanow ka to mgo daan to marodyow no mgo otow, woy kono ka ogsuwoy to mgo daan to mgo matuarong no mgo otow. ²¹ Ogpaka-ugpo ka mgo matuarong no mgo otow duon to tano, woy ogpalinggaat duon ka mgo otow no waro igkosawoy, ²² di ogkatampod ka pog-ugpo to

mgo maddoot duon to tano, woy ogkabagnus duon ka mgo otow no ogsuwoy-suwoy.

Timul Pad no Igkabulig to Kougsoban

3¹ Anak, doka'g kalingawi ka mgo udlin ku, ikannugun nu atag ka mgo sugu ku duon to goinawa nu, ²hoo, su ogpakamaadyat lagboy sikan to ukul nu, woy ogkaruonan ka. ³Doka'g ongkori ka dakol no goinawa woy ka kamaugotan; ibaliog nu atag, woy isulat nu duon to goinawa nu. ⁴Hoo su ko ogpalinggaat sikan to koikow, ogkarago ka Magboboot woy ka mgo otow koikow woy ogkangaranan ka.

⁵Saligi nu ka Magboboot to tibon goinawa nu, woy doka'g sandig duon to koikow ro no katagaanan; ⁶ilaa nu sikandin to tibon mgo poghipanow nu, woy ogtul-iron din ka mgo daan nu.

⁷Doka'g doromdon no mougsobon kad on; kahalloki nu ka Magboboot atag, woy ongkori nu ka karootan ⁸odyow no ogmarodyow ka panlawa nu, woy ogmadigon ka mgo bokog nu.

⁹Ilaa nu ka Magboboot pinabadyo to saapi nu woy pinabadyo to an-anadyan no bogas to tibon mgo pinamua nu; ¹⁰no sikan ian ogkaponu-ponu ka laapong nu, woy ogtigis on ka tadyaw nu to iam no binu.

¹¹Anak, doka'g samilii ka pogsapad to Magboboot, woy doka'g kabou ko og-ogotan ka rin, ¹²su ogsaparan to Magboboot ka mgo indakoli to goinawa rin, unawa to amoy no ogsapad to anak din no igkarago din.

¹³Naboligan ka otow no ogpakakita to kougsoban, woy ka otow no ogpakatimul to katagaanan din, ¹⁴su madmarodyow ka kougsoban to saapi, woy dakol-dakol ka ogkapurut to kougsoban to bulawan.

¹⁵Mahal pad ka kougsoban to mgo mahalon no mgo batu, woy kono ogpakatopong kandin ka agad nokoy no ogkoiniatan nu. ¹⁶Ogbogoy ka kougsoban to maadyat no ukul, woy songo ogkabogadyan ka to saapi woy to kabantug. ¹⁷Maddodyow ka mgo daan to kougsoban, woy ogdoog sikan to ka-awangan. ¹⁸Unawa't kadyu to koudyagan ogbogoy ka kougsoban to marodyow no pog-ugpo duon to otow no oggon-gon kandin, woy ogkaboligan ka otow no ogkop-kop to kougsoban.

¹⁹Pigpos-ok to Magboboot ka kalibutan pinabadyo to kougsoban, woy pinabadyo to pogsabut pigtapid din ka langit,

²⁰ pinabadyo to katagaanan pigbaad to Magboboot ka mgo woig, woy inpo-uran din ka mgo saagapun.

²¹ Anak, ikannugun nu ka marodyow no poghusoy woy marodyow no pogdoromdom, doka'g lokoi sikan; ²² hoo su ogbogoy sikan to koudyagan nu woy ogkounawa sikan to baliog duon to liog nu.

²³ Ogpakahipanow ka no waro igkobaybadyari nu, woy kono ka ogkatiklobu; ²⁴ ko oghibat ka, kono ka ogkahallok; ko oghirogo ka, marodyow ka poghirogo nu. ²⁵ Doka'g kahallok no ogkatokowan ka to igkobaybadyari woy doka'g koipong no ogkawaraan ka unawa to oglopow duon to mgo maddoot no otow, ²⁶ su ka Magboboot ian ka ogsaligan nu, woy ogbantoy sikandin no kono ka ogkalit-ag.

²⁷ Doka i-oog ka karodyowan to otow no litos no ogkabogadyan ko duon litos no igbogoy nu. ²⁸ Doka'g nangon duon to songo otow nu to “Libong ka pad; asoom kud ibogoy” ko duon on to koikow kuntoon ka igbogoy nu porom. ²⁹ Doka'g babantak duon to songo baoy nu, su nig-ugpo sikandin no marani nu no nigsalig koikow.

³⁰ Doka'g badyungi to karootan no waro pugtian ka otow no waro nighimu to maroot koikow. ³¹ Doka'g koima to mabuut no otow woy doka'g untul to mgo daan din ³² su ogdomotan to Magboboot ka otow no ogsuwoy-suwoy di ogdanion din ka otow no matul-id.

³³ Pigtungadyawan to Magboboot ka baoy to otow no maroot, di pigboligan din ka lunggunan to matuarong no otow. ³⁴ Ogsuy-aton to Magboboot ka mgo otow no masuy-at, di ogkoid-uan din ka mgo otow no ogpasaad-saad. ³⁵ Ogpakatinawo ka mgo mousob to kabantug, di ogpasiporan to Magboboot ka mgo angol-angol.

Dorodyawi ka Kougsoban

4 ¹ pamminog kow, mgo anak ku, to pog-anad to amoy now. Pannalinga kow odyow to pogtimul to pogsabut now.

² Ogbogadyan ku sikaniu to marodyow no pog-anad, no sikan ian no kono kow og-iniug to in-anad ku. ³ To bato a pad to lunggunan to amoy ku no sagsagboka no pinaradyag no anak to inoy ku,

⁴ pignangonan a to amoy ku to “Gon-goni nu ka mgo kinagian ku to tibon goinawa nu. Toora nu ka mgo sugu ku woy ogkoudyag ka.

⁵ Purut ka to kougsoban, puruta nu ka katagaanan; doka'g kalingawi ka mgo kinagian ku, woy doka'g suwoy to daan to sikan. ⁶ Doka'g iniugi ka kougsoban woy ogkaasagan ka rin. Dakola nu ka goinawa nu kandin, woy ogbantadyan ka rin. ⁷ Ka kougsoban ian ka dorodyawi; no sikan ian no ogpuruton nu ka kougsoban. Agad pad

ko ogkawaraan ka to pogpurut, puruta nu ka pogsabut. ⁸ Iparakol nu ka kougsoban woy ogdakolon ka rin; kopkopi nu sikan woy og-ilon ka rin. ⁹ Ogdadassagan ka rin to koid-u woy to kabantug.”

¹⁰ pamminog ka anak, woy tinawaa nu ka mgo ogkagion ku, woy ogmoon-ing ka mgo tuid to ukul nu. ¹¹ Ogtuonon ku sikoikow to daan to kougsoban, woy og-aapon ku sikoikow to mgo matul-id no daan. ¹² Ko oghipanow ka, kono ka ogkabaabagan, woy ko ogpallaguy ka kono ka ogkasaligkat. ¹³ Gon-goni nu ka in-anad, woy doka nu oglokoi; ikannugun nu ian su sikan ka ogbogoy to koudyagan koikow. ¹⁴ Doka’g diok duon to daan to karootan, woy doka’g unug to daan to mgo maddoot no otow. ¹⁵ Samilii nu sikan no daan, liku ka woy paragasa ka to poghipanow nu. ¹⁶ Hoo su kono ogpakahirogo ka mgo maddoot ko kono pad sikandan ogpakahimu to karootan. Ogapuwow sikandan ko waro otow no ogkasaligkat dan. ¹⁷ Unawa to koonon dan ka karootan woy unawa to og-inomon dan ka pogpasakit. ¹⁸ Ka daan to matuarong no otow, unawa to kaadyag to pogsilo to allow, no og-ungud ogmaadyag taman to ka-awangan to matikang on ka allow. ¹⁹ Di ka daan to mgo maddoot no otow atag ogko-unawa to maraom no dooman; kono ogkataga sikandan ko nokoy ka ingkasaligkat dan.

²⁰ Anak ku, pannalinga ka to ignangon ku, woy dorodyowa nu ka pogpamminog to mgo kinagian ku. ²¹ Pitowa nu sikan ladyun, woy ikannugun nu duon to goinawa nu, ²² su ogbogoy soini no mgo kinagian to koudyagan duon to otow no ogpakakita to soini, woy ogbogoy sikan to karodyowan to tibon panlawa to otow. ²³ Labow to tibo, bantadyi nu ka goinawa nu, su sikan ka sobsob to koudyagan nu. ²⁴ Awaa nu ka ogpakasuwoy no mgo kinagian duon to bobo nu; waro porom maroot no kinagian duon to bibig nu. ²⁵ Pipitow ka ladyun to kohuna-an nu, woy ungud ka ogloong-loong dio to ogkatangkaan nu. ²⁶ Hipanow ka ro duon to nignanaapu no mgo daan, woy duon ka ro ladyun ogdiok to pigdorodyowan no pagindaanan. ²⁷ Doka’g suwoy pohondio to kawanan woy ko pohondio to gibang. Doka’g pauguti ka paa nu to pogdoog to karootan.

Doka’g Hilabot to Kono’n Asawa Nu

5 ¹ Anak, pannalinga ka to kougsoban ku, woy dorodyow ka to pogpamminog to mgo igtuario ku, ² odyow no ogpalingaat ka marodyow no pogdoromdom nu, woy og-ungud ka ogkagi to

katagaan. ³ Moomis pad to tonob ka mgo kinagian to boi no kono'n asawa nu, woy maurok pad to lana ka nangnangonon din, ⁴ di to kaugadyan mapoit pad sikandin to aporu, woy magaang pad sikandin to moirob no daruwa so gaang. ⁵ Ogdoog to kamatadyon ka poghiapanow rin, woy ka daan din ogpakaparagas duon to lobongan. ⁶ Kono din ogdoromdomon ka daan to koudyagan; nigsuwoysuwoy ka mgo daan din, di waro din matagoi. ⁷ No kuntoon, mgo anak ku no lukos, pamminogi a now; dokow ogsuwoy ligkat to innangon ku. ⁸ Pamariu ka to daan no marani to sikan no agkadyon no boi, woy doka'g dani to gomawan to baoy rin, ⁹ odyow no kono nu igkabogoy ka dadyagang nu duon to loin no otow woy ka mgo tuid nu duon to og-uang-uang koikow, ¹⁰ woy odyow no kono ogkokoon ka mgo kono'n duma nu puun to koikow no saapi, woy loin no otow ka ogkadatu puun to koikow no tarabau. ¹¹ Ko ogkatapus on ka ukul nu ogdaow ka, no warad on dadyagang to lawa nu. ¹² Ogsondit ka no kagi to "Manio to pig-usig ku ka pogsapad? Manio to pigsamilian to goinawa ku ka pogpatul-id? ¹³ Waro ku pamminoga ka nig-anad koddi, woy waro a nigpanalinga to mgo nigpadoromdom kanak. ¹⁴ Hantod to magaan ad ogkasiporan to taliwaro to tibon koot-otowan."

¹⁵ Inom ka to woig ligkat to koikow ro no sakoruanan, woy ligkat to koikow ro no sobsob. ¹⁶ Manio to ogtu-aug ka sobsob nu duon to pagindaanan? Manio to ogtulibis ka woig nu duon to mgo limuranan to mgo otow? ¹⁷ Koikow ro porom sikan, woy kono igkopana-ad sikan to duma no otow. ¹⁸ Okgaboligan porom ka sobsob nu, woy ogkarago ka ladyun porom to asawa no nigludyud koikow ligkat to baubato ka pad. ¹⁹ Hoo su mohubung sikandin unawa to punoy, woy dakol ka goinawa rin koikow – ogkabuung ka ladyun poron to sosoobon din, woy ungod ka ogkarago-dago porom to kandin no goinawa koikow. ²⁰ Anak, manio to ogkarago-dago ka to boi no kono'n asawa nu? Manio to ogkop-kopan nu ka asawa to loin no lukos? ²¹ Hoo, su ogkitoon to Magboboot ka tibon mgo hinimuan to otow, woy ogmoog-moogan to Magboboot ka tibon mgo daan nu. ²² Ogkalit-agan ka maroot no otow pinabadyo to maroot no mgo hinimuan din, woy ogkabaku sikandin to sao din. ²³ Ogkamatoy sikandin tongod su waro pogponod din, su nigsuwoysuwoy sikandin tongod to waro katagaan din.

Moitongod to Pog-abin to Utang to Songo Otow

6¹ Anak, ko pig-abin nu ka utang to songo otow, ko nangulibot ka no ogbadyaran nu sikan, ² ko nalit-agan ka to mgo ingkakagi nu, ³ no soini ka oghimuon nu, Anak. Poomot ka no ogpakalibuwas ka, su nadiraom kad on to pogboot to songo otow. Hondio ka to kandin woy pasaadsaad ka; poid-u-hoid-u ka to sikan no otow. ⁴ Doka'g himooy, woy doka'g pauguti ka mgo mata nu to pogpiung to hirogo. ⁵ Pallaguy ka, unawa to usa no ogpakasabuk to poggon-gon to nigpanitingon, woy unawa to manuk-manuk no ogpakasabuk to lit-ag to taagpanlit-ag.

Moitongod to Pogpamakut

⁶ Poguon no otow, pitowa nu ka makut. Doromdoma nu ka kandin no mgo hinimuan odyow no ogmougsob ka! ⁷ Waro taagsugu to makut, waro nigbantoy, woy waro igbudyag, ⁸ di oglmuron din ka mgo ogkoonon din to guabung, woy ogpamuruton din ka koonon din to tinggaani. ⁹ Monu kaugoy no oghibat-hibat ka duon, poguon no otow? Kon-u ka og-onow ligkat to poghirogo nu? ¹⁰ Kagi nu to "Oghirogo a pad dagdagow, oghibat-hibat a pad, ogpangadyopkop a ro to doisok su oghimooy a." ¹¹ Dokad di, oglopow ka igkawaroi nu unawa to bagani no oggopas.

Ka dorooti no Otow

¹² Soini ka oghimuon to otow no dorooti woy waro puus: ungod og-uubat sikandin, ¹³ ogsingyas sikandin to pogpoitaga pinabadyo to mgo mata, mgo paa woy mgo boad din, ¹⁴ ogbabantaan sikandin to karootan no ogkoiniat to poggawoy, woy ungod ogwawangal sikandin. ¹⁵ No sikan ian no inogo ogkasaponan sikandin to igkobaybadyari; ogkagugus sikandin to sagboka ro no pogpoo-poo no konad ogkoulian. ¹⁶ Duon hon-om no igkabou to Magboboot, papitu no maligsom to pogpitow rin: ¹⁷ ka pogpitow no ogdoisok to duma, ka dilo no ungod og-ubat, mgo boad no ogpatuligis to langosa to otow no waro nakasao, ¹⁸ ka goinawa no ogbabantaan to maroot no oghimuon, mgo paa no matallong to pogparoog to karootan, ¹⁹ ka otow no ogpamaugot to ubat, woy ka otow no ungod ogwawangal taliwaro to mgo matal-taasuod.

Pogpamariu to Kono'n Asawa Nu.

²⁰ Anak, pannalingaa nu ka mgo sugu to amoy nu, woy doka'g iniugi ka mgo udlin to inoy nu. ²¹Ibagkos nu ka innangon dan duon to goinawa nu, woy balioga nu sikan taman to katamanan. ²²Ko oghipanow ka, ogtuonon ka to sikan. Ko oghirogo ka, ogbantadyan ka to sikan. Ko oggimuat ka, ogkagian ka to sikan. ²³Hoo su, soini no mgo sugu sagboka no ilawan, woy kaadyag ka soini no mgo tuaro, woy ogpaka-aap koikow ka soini no mgo sapad duon to daan pohondio to koudyagan, ²⁴woy ogpakapamariu koikow to boi no waro boot, ogkaasagan ka to mgo moomis no kinagian to boi no ogsuwoy-suwoy puun to iglukos din. ²⁵Doka'g alig kandin duon to goinawa nu tongod su marodyow sikandin pitawon, woy doka'g pauguti no ogka-adyat ka tongod to marodyow no pogpitow rin koikow, ²⁶su duon agkadyon no boi no oghulid to lukos to badyad to sagboka ro no pan, di ka asawa to loin no lukos og-agow to ukul nu. ²⁷Naan nu buwa no ogpaka-abon ka otow to hapuy no kono ogkatutung ka kinabo? ²⁸Naan nu no ogpakahipanow ka lukos to mgo baga no kono ogkatutung ka mgo paa rin? ²⁹Sikan dod ka lukos no oghulid to asawa to loin no otow; kono ogpakabutuas to logpad ka otow no oggon-gon to sikan no boi. ³⁰Kono oglomotan to mgo otow ka takawon no otow ko pigtakow rin do ka ogkoonon din su ogkabigtawan on to gutas. ³¹Di agad to sikan, ko ogkarakop sikandin, ogbadyad sikandin to papitu no akob to pigtakow rin, agad ko ogkoubus ka tibon mgo kaaglagan to baoy rin. ³²Di waro marodyow no pogdoromdom to otow no oghulid to asawa to loin no otow. Ogguguson din do ka kandin no pog-ugpo. ³³Ogkabarasan sikandin woy ogkaawaan sikandin to kabantug woy kono ogkaawo ka igkasipod din taman to katamanan, ³⁴su ogkabou lagboy ka lukos ko ogpanalikud sikandin to asawa rin, woy kono ogkoid-u sikandin no ogsuli to pighimu to asawa rin. ³⁵Kono ogtinawo sikandin to husoy; ogligalon din ka igbotad agad ko monu karakol.

Ka Baubato no Nigsuwoy

7¹ Anak, pamminog ka to mgo kinagian ku, woy punpuna nu ka mgo sugu ku duon to goinawa nu. ² Pannalingaa nu ka mgo sugu ku woy ogpalinggaat ka no manokal; ikannugun nu ka mgo igtuaro ku iing to indakoli to goinawa nu. ³ Ibagkos nu ka sikan duon to mgo komol nu, woy ibadlis nu duon to pusung nu. ⁴ Doromdoma nu no atoboi nu ka kougsoban, woy karumahan nu ka pogsabut. ⁵ Sikandan ka ogpakakaasag koikow puun to agkadyon no boi, ian ka ogsuwoy-suwoy no asawa no og-adyat koikow pinabadyo to mgo kinagian din.

⁶ Duon allow no nigpantow a duon to pantowanan ku, woy nigsosoilang a. ⁷ Duon nakita ku taliwaro to mgo otow no waro katagaanan, sagboka no baubato no waro marodyow no pogdoromdom. ⁸ Nighipanow sikandin duon to daan marani to baoy to agkadyon no boi, no nigpadoog to baoy rin. ⁹ Katangkob on sikan, to pogbunsud to dooman. ¹⁰ No to pogpitow ku duon boi no niglibuwas to baoy, iing to kinabo to agkadyon no boi ka insau-ub din no duon hinoos no tuud din. ¹¹ (Sagboka no boi sikandin no mabukao no ungod og-atu, woy kono og-ugpo sikandin to baoy rin; ¹² Songo ka kuo duon sikandin to pagindaanan, woy ko duon to mgo limuranan to mgo otow, no ungod ogtatagad duon to mgo babaakan.) ¹³ Pigkopkopan to boi ka baubato woy pigharokan din sikandin woy nignangon ka boi to waro kasipod to ¹⁴ "Duon saapu to mgo panubad to pogkasagboka kai to baoy ku kuntoon; hoo su pigtood ku ganna ka pangulibot ku duon to Magboboot. ¹⁵ No sikan ian no niglibuwas a odyow to pogtomu koikow; pigpamangho ku sikoikow woy nakitaan kud sikoikow! ¹⁶ Pighimpod kud ka hibatanan ku to mgo dorodyawi no manggad no puun to Ehiptu ¹⁷ woy pigsabukan ku pad to mgo poomut.?" ¹⁸ Dii kad, woy ogkabuung ki to dakol no goinawa taman to kapawo; ogkarago-dago ki to poghulid! ¹⁹ Waro kai to baoy rin ka lukos; nighipanow sikandin to mariu no hipanowan. ²⁰ Naponu to saapi ka kamudyut din poghipanow rin, woy kono ian og-uli sikandin taman to ogsandig ka buwan." ²¹ No sikan ian no pig-adyat to boi ka baubato odyow no ogpakasuwoy sikandin. Pig-adyat din sikandin pinabadyo to moomis no mgo kinagian din. ²² To waro poglianlian pigsundul to boi ka baubato unawa to baka no oghipanow pohondio to iowanen, woy unawa to usa no ogsagad dio to baatik ²³ no ogkapilak ka atoy rin, woy

unawa to manuk-manuk no og-agpas duon to lit-ag, no waro mataga sikandan no ogkamatoy naan sikandan.

²⁴No kuntoon, mgo anak, pamminogi a now; pannalinga kow to ogkagion ku. ²⁵Dokow ogpauguti ka goinawa now to pogsuwoy pohondio to mgo daan to sikan no boi, dokow ogdoog dio kandin.

²⁶Moon-ing ka otow no namua rin; songo puntuk to mgo otow ka pighimatadyan din. ²⁷Ka baoy rin ian ka mau-ag no daan pohondio to lobongan, no ogtupang pohondio to mgo sinabong to kamatadyon.

Mgo Kinagian ni Kougsoban

8 ¹Nig-umow si Kougsoban, woy nigmaagbot to pogkagi si Katagaanan. ²Nighasindog sikandin duon to mgo bub-bubungan to ilis to daan woy dio to babaakan. ³Nig-umow sikandin topad to mgo gomawan no ogdoog to lunsud, duon to mgo lopowanan. ⁴Kagi ni Kougsoban to "Og-umawon ku sikaniu no mgo otow; ogkagion ku to maagbot ka tibon mgo koot-otowan. ⁵pamminog kow no mgo waro gindawanan odyow no kono kow ogkagawadyan, woy kaniu no kono ogdoromdom ogpakatinawo kow to pogsabut. ⁶pamminog kow su duon marodyow no mgo ignangon ku; litos ka oglibuwas to bibig ku. ⁷Tutuu ka ogkagion to bobo ku, su ogdomotan ku ka tibon karootan. ⁸Mohusoy ka tibon mgo kinagian to bobo ku; waro ian no ogpakasuwoy no kono'n matul-id. ⁹Ogpakapamaugot ka mgo otow no duon katagaanan no litos ka tibon mgo kinagian ku no waro makasuwoy. ¹⁰Aama now ka igtuario ku labow to saapi, woy ka katagaanan ku ampow to dorodyawi no bulawan, ¹¹su madmarodyow a to agad nokoy no mahalon no batu, woy waro ogkounawaan now kanak."

¹²Ogparagas si Kougsoban to pogkagi to "Nig-ugpo a duma to marodyow no pogdoromdom, duon katagaanan ku woy marodyow no pogboot. ¹³Ko ogkahallokan ta ka Magboboot ogdomotan ta ka karootan. Og-usigon ku ka pogparakol-dakol woy ka pogpagarol-garol, ka maroot no mgo hinimuan woy ka ogsuwoy no mgo kinagian. ¹⁴Koddi ka duon marodyow no tambag woy poghusoy; koddi ka duon katagaanan woy kabogbogan. ¹⁵Pinabadyo koddi oghari ka mgo hari, woy oghimu ka mgo igbudyag to litos no mgo uclin. ¹⁶Pinabadyo koddi ogboboot ka marodyow no mgo datu, woy ka tibon mgo maddodyow no mgo igbudyag to kalibutan. ¹⁷Dakol so goinawa ku to mgo otow no duon goinawa kanak, woy

ogkitoon a to agad hontow no ogpamangho koddi. ¹⁸ Pinabadyo koddi duon saapi woy pogkabantug, duon matuarong no pogkadatu no ogpalingaat. ¹⁹ Ka bogas ku madmarodyow to dorodyawi no bulawan, woy ka ogligkat kanak labow pad to saapi. ²⁰ Oghipanow a to daan to pogkamatarong, duon to mahusoy no mgo daan ²¹ no ogpambogadyan ku to saapi ka mgo otow no duon dakol no goinawa koddi, no ogkaponu ka mgo sabukanan dan to mgo kaaglagan.”

²² Ogparagas ogkagi si Kougsoban to “Pighimu a to Magboboot no an-anadyan no hinimuan din, to waro pad mabunsuri ka duma no mgo hinimuan din to dongan pad. ²³ Pigsabuk a rin puun to binunsuran to dongan pad to waro pad pighimu ka kalibutan. ²⁴ To waro pad mgo dagat woy mgo sobsob no ogtu-augan to dakol no woig, nohimu ad on taan. ²⁵ To waro pad insabuk ka mgo dagdakol woy malmaintok no bubungan to mgo longod dan, nohimu ad on taan. ²⁶ To waro pad pighimu rin ka tano woy ka mgo pinamua-an woy ka abug duon to kalibutan, duon ad. ²⁷ To pogsabuk to Magboboot to langit duon to ampow, woy to pogbadlis din to patamanan to langit dio to ampow to mgo woig, duon ad. ²⁸ To poghal-ag din to mgo kibol dio to ampow, woy to pogsabuk din to mgo sobsob to diraom, duon ad. ²⁹ To poghimu rin to oatan to dagat odyow no kono oglampas ka mgo woig to sugu din, woy to pog-adyad-adyad din to mgo sungkaug to kalibutan, duon ad. ³⁰ No sikoddi ka mapandoy no duma rin. Narodyowan a lagboy allow-allow, no narago a to pogduma kandin, ³¹ woy narago a to tibon kalibutan, woy narodyowan a to koot-otowan no pighimu rin.”

³² Nigkagi pad si Kougsoban to "No kuntoon, mgo anak ku, pamminogi a now; ogkaboligan ka otow no og-unug to mgo daan ku. ³³ pamminoga now ka igtuario ku odyow no ogmougsob kow; dokow ogbaagara. ³⁴ Ogkaboligan ka otow no ogpamminog kanak no si Kougsoban, ogbabantoy sikandin allow-allow duon to mgo lokob ku, woy ogtakaran a rin duon to gomawan to baoy ku. ³⁵ Hoo su agad hontow no ogpakakita kanak ogpakakita to koudyagan woy ogpakatinawo sikandin to karodyowan puun to Magboboot. ³⁶ Di agad hontow no kono ogpakakita koddi oglogparan din ka kandin do no lawa; kamatadyon naan ka indakoli to goinawa to otow no ogdomot koddi.”

Ka Poghinggat ni Kougsoban woy ni Ka-angol

9¹ Pighimu ni Kougsoban ka dorodyawi no baoy rin no duon papitu no suwoy. ² Pig-iow rin on ka mgo adyam din, woy pinogsoug din on ka binu rin; pighimpod din on ian ka koonanan din. ³ Inpa-aap din on ka mgo suguanon din no mgo boi odyow to pog-umow to poghinggat duon to matikang no mgo baoy to lunsud. ⁴ Kagi rin duon to mgo otow no waro marodyow no boot “Kai kow tibo no mgo waro gindawanan!” ⁵ “Dii kow, koona now ka koonon ku woy inuma now ka binu no pinogsoug kud on. ⁶ Ongkori now ka mgo daan now to waro gindawanan odyow no ogkoudyag kow; hipanow kow to mgo daan to pogsabut.” ⁷ Kagi pad ni Kougsoban to “Ogkatambaboan ka otow no ogtul-id to otow no taagsuy-at; woy ogpandooton ka otow no ogsapad to dorooti no otow. ⁸ Doka'g sapad to taagsuy-at no otow su og-usigon ka rin; di ko ogsaparan nu ka mougsoob no otow, ogdakolon din ka goinawa rin koikow. ⁹ Tuona nu ka mougsoob no otow woy ogkatimuan pad ka kougsoban din; nangnangoni nu ka matuarong no otow woy ogkatimuan pad ka katagaanan din.” ¹⁰ Ogparagas si Kougsoban to “Ka pogkahallok duon to Magboboot ian ka binunsuran to kougsoban, woy ka katagaanan to In-oog no Magboboot ian ka pogsabut. ¹¹ Hoo su pinabadyo koddi ogmoon-ing ka mgo allow nu, woy ogkatimuan ka mgo tuid to ukul nu. ¹² Ko ogmougsoob ka, ogkadassagan ka to kougsoban nu; di ko ungud ka ro ogsuy-at, koikow ro ka ogkabaybadyaran.”

¹³ Mabukao no boi no si Ka-angol; kono ogkasaparan sikandin, woy waro katagaanan din. ¹⁴ Nigpinnuu sikandin duon to gomawan to baoy rin, duon to sagboka no pinnuuanan to ampow-ampow to lunsud. ¹⁵ Oghinggatton din ka mgo otow no ogligad; mgo otow no oghipanow to marodyow. ¹⁶ Kagi ni Kaangol duon to mgo otow no waro litos no boot to “Kai kow tibo no mgo waro katagaanan! ¹⁷ Hoo su moomis ka pigtakow no woig; woy managomnom ka koonon no ogkoonon to oghoos!” ¹⁸ Waro mataga naan ka mgo otow no ogkammatooy ka ogsood to baoy ni Ka-angol, woy ka pigpanhinggat din ian ka nigdoog to lobonganan.

Mgo Panuaro ni Solomon

- 10**¹ Soini ka mgo pogpanuaro ni Solomon: Ogkarago ka amoy to mougsoob no anak din, di ogmasakit ka goinawa to inoy to angol-angol no anak din.
- ² Waro puus to karatuan no pigpurut pinabadyo to maroot no hinimuan, di ogpakapangabang to otow puun to kamatadyon ka pogkamatuarong din.
- ³ Kono ogpaugutan to Magboboot no oggutasan ka matuarong no otow, di ogbaabagan din ka noibogan to maroot no otow.
- ⁴ Ogdawaraan ka otow no kono ogpamakut, di ogkadatu ka otow no ogpoomot.
- ⁵ Mougsoob no anak ka ogpunpun to mgo bogas to tinggaani, di makasisipod ka anak no oghidhirogo to tig-oogba.
- ⁶ Ogdaboligan ka matuarong no otow, di ogpatultuarong to pogkagi ka maroot no otow to poghoos to kabuuti rin.
- ⁷ Ogdaboligan ka mgo otow ko ogdoromdomon dan ka mgo matuarong no otow, di ogkamou do ka ngaran to mgo maddoot no mgo otow.
- ⁸ Ogtinawo to mgo sugu ka mougsoob no otow, di ogkabaybadyaran ka angol-angol no otow no wangaon.
- ⁹ Kono ogkasasow ka otow no kono ogsuwoy-suwoy to litos no daan, di kono ogpakahoos ka otow no ogtiku-tiku to ogbadyaan din.
- ¹⁰ Ogmasakit ka goinawa to mgo otow ko ogkagawadyan sikandan, woy ogkabaybadyaran ka angol-angol no otow no wangaon.
- ¹¹ Unawa to marodyow no sobsoob no ogbogoy to koudyagan ka mgo kinagian to matuarong no otow, di ogpatultuarong to pogkagi ka maroot no otow to poghoos to kabuuti rin.
- ¹² Ogpakapapukow to pog-ogot ka maroot no goinawa, di moon-ing ka mgo sao no ogkabunbunan to marodyow no goinawa.
- ¹³ Mougsoob ka mgo kinagian to otow no ogkatou to pog-aam to marodyow, di ogkalamposan ka otow no kono ogkatou to pog-aam to marodyow.
- ¹⁴ Ogpunpunon to mougsoob no otow ka katagaanan din, di magaan ogkaguak ka pog-ugpo to wangaon no otow.
- ¹⁵ Ogdakaasagan ka mgo datu pinabadyo to saapi dan, di waro ig-atang to mgo otow no nawaraan.

- 16 Koudyagan ian ka badyad to pogkamatuarong, di mgo logpad ian ka badyad to karootan.
- 17 Agad hontow no ogpannalinga to pogsapad ogpakatuon to duma to daan to koudyagan, di ka otow no kono ogpamminog to ignangon ogpakapasuwoy to duma pad no otow.
- 18 Ubaton ka otow no oghoos to pogdomot din, woy angol-angol ka otow no ogpatangkap to taosob.
- 19 Ogpakasao ka otow ko moon-ing on ka igkakagi, di mougsoob ka otow no ogpo-onong-onong do to pogkagi.
- 20 Unawa to dorodyawi no plata ka mgo kinagian to matuarong no otow, di waro puus ka goinawa to maroot no otow.
- 21 Moon-ing ka ogkabuung puun to mgo kinagian to matuarong no otow, di ogkammatooy ka mgo otow no angol-angol su waro marodyow no doromdom dan.
- 22 Ogpakadatu ka pogbolig to Magboboot, woy waro igtimul din no igkobaybadyari.
- 23 Angol-angol ka otow no ogkarago to poghimu to karootan, di igkarago to ogpakasabut no otow ka kougsoban.
- 24 Ogkoumaan ka maroot no otow to noipongan din, di ogkabogadyan ka matuarong no otow to noiniatan din.
- 25 Ko ogligad on ka daldaa-ot, ogka-awo ka maroot no mgo otow, di ogpalingaat ka mgo matuarong to waro katamanan.
- 26 Unawa to suka duon to mgo ngipon ta, woy unawa to obol duon to mata ta ka poguon no suguanon duon to nigsugu kandin.
- 27 Ogkatimuan ka ukul ta ko ogkahallok ki duon to Magboboot, di ogmaupoton ka ukul to maroot no mgo otow.
- 28 Ka karago ian ka ogko-im-imanen to mgo matuarong no otow, di kono ogkatood ka noim-imanen to mgo maroot no otow.
- 29 Ka daan to Magboboot ian ka madigon no aputanan to mgo matuarong, di ogkagugus dio ka nighimu to karootan.
- 30 Kono ogkabagnus ka mgo matuarong no otow, di kono ogpalingaat ka mgo maroot duon to tano.
- 31 Kougsoban ka oglibuwas to bobo to matuarong no otow, di ka dilo no ogsuwoy-suwoy ogkatamporan.
- 32 Nataga ka matuarong no otow ko nokoy ka litos no ogkagion, di ogpasulswadyon ka ogkagion to maroot no otow.
- 11** ¹ Ogdomoton to Magboboot ka kono'n litos no timbangan, di ogkarago sikandin to maugot no kiluhan.

- ² Ogasiporan ka otow no ogparakol-dakol, di ogpokogludyud ka pogpasaad-saad woy ka kougsoban.
- ³ Kono ogpakatipas ka matuarong no otow su kono ogsuwoy-suwoy sikandin, di ogkaguak ka pog-ugpo to mgo otow no kono ogkasaligan tongod to kandan no poggawoy.
- ⁴ Waro puus to saapi to allow to poglogpad, di ogpakalipuwas to otow ka pogkamatuarong din.
- ⁵ Ka pogkamatuarong dan ian ka ogtul-id to daan to mgo otow no waro igkosawoy, di ka karootan dan ian ka ogpakapasaligkat to mgo maddoot no otow.
- ⁶ Ogpakabutas ka marodyow no otow tongod to pogkamatuarong din, di ogkalit-agan ka kono ogkasaligan no otow tongod to maroot no mgo noibogan din.
- ⁷ Ko ogkamatoy ka maroot no otow, songo ogkamatoy ka noim-imanan din; warad on puus ka pigsaligan din no kabogbogan.
- ⁸ Ogpapangabangan ka matuarong no otow duon to koirapan, di ka maroot no otow atag ka oglopowan to sikan no igkobaybadyari.
- ⁹ Okgagugus ka pog-ugpo to otow pinabadyo to kinagian to songo baoy rin no mariu to Magboboot, di pinabadyo to katagaanan dan ogkalipuwasan ka matuarong no otow.
- ¹⁰ Ko ogtulin ka matuarong no otow, ogkarago ka tibon mgo otow to lunsud, woy ko ogkamatoy ka maroot no otow, moon-ing ka ogkukuus.
- ¹¹ Ogmabantug ka sagboka no lunsud ko ogkaboligan to matuarong no otow, di ogkagugus ka lunsud pinabadyo to bobo to dorooti no otow.
- ¹² Waro marodyow no pogdoromdom to otow no ogtambabo to songo baoy rin, di ogpo-onong-onong do ka otow no duon marodyow no pogdoromdom.
- ¹³ Ogpuwasan to wangaon no otow ka ighoos no kinagian, di kono ignangon-nangon sikan to otow no ogkasaligan.
- ¹⁴ Okgaro-og ka nasud ko waro marodyow no igtuario, di ogpakaroog sikan ko moon-ing ka ogtambag.
- ¹⁵ Ogpakabaybadyaran ka otow no ogpasalig to pogbadyad to utang to duma no otow, di waro igkosasow to otow no ogligal to pogpangulibot.

- ¹⁶ Ogkatimuan ka pog-ila to boi no maomu, di saapi do ka igkatimul to lukos no waro koid-u.
- ¹⁷ Ka otow no moid-uon to duma ogbulig to kandin do no pogkootow, di ka otow no waro koid-u to duma ogpang-umow to igkobaybadyari rin.
- ¹⁸ Waro puus to saapi no ogkatinawo to maroot no otow, di ka otow no og-orok to pogkamatuarong ogga-ani to dassag no kono ogka-awo.
- ¹⁹ Ogpakatinawo to koudyagan ka matuarong no otow, di ogdoog do to kamatadyon ka otow no ogsundul to karootan.
- ²⁰ Og-usigon to Magboboot ka otow no ogpasuwoy-suwadyon ka goinawa, di igkarago din ka mgo otow no waro igkosawoy.
- ²¹ Ogkasaligan soini; kono ogpokohoos to logpad ka maroot no otow, di ogpakistanawo ka matuarong no otow.
- ²² Iing to bulawan no galunggalung duon to irong to baboy ko duon mohubung no boi no waro marodyow no pogdoromdom.
- ²³ Ka ogkoiniatan to matuarong no otow ogdoog to karodyowan, di ka og-im-imanan to maroot no otow ogdoog do to kabou to Magboboot.
- ²⁴ Duon otow no mabogoy-bogoy, di ogdakol pad ka duon to kandin; duon dangob no otow no logoron, di ogkawaraan on sikandin atag.
- ²⁵ Ogtulin ka otow no mabogoy-bogoy; ogkabuligan ka otow no ogbulig to duma.
- ²⁶ Ogkatungadyawan to mgo otow ka otow no og-oog to bogas no dakol, di ogkaboligan ka otow no ogduad to sikan.
- ²⁷ Ogpakakita to karodyowan ka otow no ogpamangho to karodyowan, di karootan ian ka oglopow to otow no ogpamangho to karootan.
- ²⁸ Ogpapood ka otow no ogsandig duon to pogkadatu din, di ogkounawa to moilow no doun no kono ogkagangu ka otow no matuarong.
- ²⁹ Waro ogkatinawo to otow no og-aap to igkobaybadyari duon to lunggunan din, woy ogkohimu no suguanon to mougsoob no otow ka angol-angol no otow.
- ³⁰ Koudyagan ian ka bogas to matuarong no otow, di kamatadyon ian ka bogas to mabuut no otow.

³¹ Ko tutuu ian no ogkasulian ka matuarong no otow kai to tano, labow pad ka otow no kono ogtuu to Magboboot woy ka otow no ogpakasao.

12 ¹ Ka otow no duon goinawa to katagaanan ogkarago ko ogsaparan sikandin, di waro marodyow no pogdoromdom to otow no ogkabou ko ogsaparan sikandin.

² Ogpakatinawo to karodyowan puun to Magboboot ka otow no marodyow, di ogsao-on to Magboboot ka otow no ogbabantaan to maroot.

³ Kono ogpakapos-ok ka pog-ugpo to otow pinabadyo to karootan, di kono ogkabagnus ka pog-ugpo to otow no matuarong.

⁴ Igabantug to lukos ka igboi no maungangon, di unawa to igkamou to mgo bokog to lukos ka igboi no oghimu to makasisipod.

⁵ Mahusoy ka ogbantanon to mgo matuarong no otow, di ogpakagaway ka tambag to maroot no otow.

⁶ Ogpakamatoy ka mgo kinagian to maroot no otow, di ogpakapangabang kandan ka kinagian to matuarong no otow.

⁷ Ogaro-og ka maroot no mgo otow woy warad on sikandan, di kono ogka-antog ka lunggunan to matuarong no otow.

⁸ Ogasadyo ka otow tongod to kougsoban din, di ogkasamilian ka otow no ogpasulswadyon ka pogdoromdom.

⁹ Madmarodyow ka kono ogkangaranan no otow no duon suguonon to otow no ogpatuu no mabantug sikandin dokad di waro ogkoonon din.

¹⁰ Agad ka adyam to matuarong no otow ogkabantadyan din to marodyow, di waro koid-u agad to dorodyawi no'g himuon to maroot no otow.

¹¹ Dakol ka ogkakoon to otow no ogpoomot to pogkakamot, di waro marodyow no pogdoromdom to otow no ogsundul to waro puus no mgo daan.

¹² Ogko-ibogan to maroot no otow ka ogkoutol pinabadyo to karootan, di ogmarodyow ka pog-ugpo to matuarong no otow.

¹³ Ogalit-agan ka maroot no otow pinabadyo to masuwoy-suwoy no kinagian din, di ogpakamariu to koirapan ka matuarong no otow.

- 14 Ogkaantoy ka otow puun to bogas to marodyow no mgo kinagian din, unawa to ogkadassagan sikandin puun to pogpoomot to mgo boad din.
- 15 Naan to angol-angol no otow no litos ka kandin no daan, di ogpamminogon to mougsob no otow ka tambag to duma no mgo otow.
- 16 Ogpoitaga dadyon no nabou sikandin ka otow no waro marodyow no pogdoromdom, di ogbaagaron to otow no marodyow to pogdoromdom ko ogtambaboon sikandin.
- 17 Ogpoitaga to kamaugotan ka otow no ogkagi to litos, di oggawoy ka otow no ogpamaugot to ubat.
- 18 Ogasakitan ka mgo otow pinabadyo to mgo kinagian to otow no kono ogdoromdom panoy, di ogkoulian ka igmasakit to goinawa pinabadyo to mgo kinagian to mougsob no otow.
- 19 Ogpalinggaat taman to katamanan ka otow no ogkagi to kamaugotan, di magaan ogkaawo ka otow no ogkagi to ubat.
- 20 Mgo gawoy ka duon to goinawa to mgo otow no ogbabantaan to karootan, di karago ka duon to goinawa to mgo otow no ogpatangkap to kahanong.
- 21 Waro karootan no oglopow duon to matuarong no otow, di ladyun oglopowan to koirapan ka dorooti no otow.
- 22 Og-usigon to Magboboot ka otow no ogkagi to ubat, di ogkarago sikandin to mgo otow no ogkagi to kamaugotan.
- 23 Kono ogpangagikagi ka otow no duon marodyow no pogdoromdom to tibo no natagaan din, di ogpoitaga ka angol-angol no otow to pogka-angol din.
- 24 Ogmabogot ka igbudyag ka mapamakut no otow, di ogkohimu no uripon ka poguon no otow.
- 25 Ogmabogat ka goinawa to otow ko duon igkasasow rin, di ogma-agkap ka goinawa rin ko duon ogkagi to marodyow kandin.
- 26 Ogpoko-inagak to mgo duma rin ka matuarong no otow, di ogpakasaligkat kandan ka dorooti no otow.
- 27 Kono ogsugnu-on to poguon no otow ka pigpanitingon din, di ogtapiron to mapamakut no otow ka mgo kaaglagan din.
- 28 Duon koudyagan to daan to matuarong no otow, di ogdoog to kamatadyon ka daan to karootan^a.

^a12:28 Dangob no hokad to Hibriu ognangon ‘Waro kamatadyon to sikan no daan.’”

- 13** ¹Ogbabalion to marodyow no anak ka igtuario to amoy rin, di kono ogpamminog to sapad ka ungud og-atu no anak.
- ²Marodyow ka ogkatinawo to otow pinabadyo to marodyow no mgo kinagian din, di ian do ogko-ibogan to mgo matigawoy ka pogpasakit to duma.
- ³Ogbantoy to koudyagan din ka otow no ogbantoy to ogkagion din, di magaan ogkaguak ka pog-ugpo to otow no magaan ogpangagikagi.
- ⁴Ungud ogko-ibog ka poguon no otow, di waro ogkoutol din, di ogkatood lagboy ka noiniatan to mapamakut no otow.
- ⁵Og-usigon to matuarong no otow ka kono'n litos, di oghatod to kasiporan ka mgo dorooti no otow.
- ⁶Ogkabantadyan ka otow no waro igkosawoy pinabadyo to pogkamatarong din, di ogkaro-og ka otow no makasasao pinabadyo to pogkasabandal din.
- ⁷Duon otow no ogpatuu no datu sikandin, dokad di waro kandin; songo duon otow no ogpatuu no nawaraan sikandin, dokad di dakol ka duon to kandin.
- ⁸Ogpakabaukas ka datu to koudyagan din, di waro oghinallok to otow no nawaraan.
- ⁹Unawa to maadyag no ilawan ka koudyagan to matuarong no otow, di unawa to ilawan no magaan ogkoobukan ka koudyagan to dorooti no otow.
- ¹⁰Ka pogpan-ogot ian ka bogas to pogparakol-dakol, di mougsob ka mgo otow no ogpamminog to tambag.
- ¹¹Magaan ogka-awo ka saapi no napurut to magaan do^b, di ogtulin ka saapi no pigpamakutan.
- ¹²Ogmasakit ka goinawa ta ko ungud ogkabaabagan ka pigtatagan ta, di oglibong ka dadyagang ta ko ogkatood ka pig-im-imaan ta.
- ¹³Ogkabaybadyaran ka otow no ogsamili to ogpamminog to igtuario, di ogkadassagan ka otow no ogpanalinga to sugu.
- ¹⁴Unawa to sobsob to koudyagan ka igtuario to mougsob no otow, odyow no kono ogpakasagad ka otow to mgo lit-ag to kamatadyon.
- ¹⁵Og-iloon ka otow ko marodyow ka pogdoromdom din, di ogkabaybadyaran ka otow no kono ogkasaligan.

^b13:11 To magaan do: dangob no hokad 'pinabadyo to karootan'

- ¹⁶ Panadyon ogdoromdoma to mougsoob no otow ka oghimuon din woy rin oghimua, di ogpapitow ka angol-angol no otow to ka-angoan din.
- ¹⁷ Ogko-tuug to koirapan ka dorooti no taagnangon, di ogpaka-aap to pogpokog-uli ka ogkasaligan no inpa-aap no otow.
- ¹⁸ Ogdawaraan woy ogkasiporan ka otow no kono ogpannalinga to pogsapad, di ogmabantug ka otow no ogpamminog to pogpatul-id.
- ¹⁹ Moomis ka oggoramon ta ko ogkatood ka pig-im-imaan ta, di ogdomot ka angol-angol no otow to pog-iniug to karootan.
- ²⁰ Ogmougsoob ka otow no ogduma-ruma to mgo mougsoob no otow, di ogkabaybadyaran ka otow no ogludyud to mgo angol-angol.
- ²¹ Ungud ogkalopowan to igkobaybadyari ka otow no ladyun ogpakasao, di ogkadassagan ka matuarong no otow to pogtulin.
- ²² Duon igtugun-tugun to marodyow no otow pohondio pad to mgo anak to mgo anak din, di ka saapi to makasasao no otow oghondio do dio to mgo matuarong no otow.
- ²³ Agad ko dakol ka abut to kamot to otow no nawaraan, kono sikandin ogkapuusan to sikan su ogka-agowan sikandin to mgo dorooti no otow.
- ²⁴ Ka otow no kono oglampos to anak din ogpoitaga no pig-usig din ka anak, di ka otow no duon dakol no goinawa to anak din ogsapad kandin ko ogpakasao ka anak.
- ²⁵ Ogdabuung to pogkoon ka mgo matuarong no otow, di oggutasan ka dorooti no mgo otow.
- 14** ¹ Ogpadigonon to mougsoob no boi ka lunggunan din, di ogguguson to angol-angol no boi ka kandin no lunggunan pinabadyo to mgo oghimuon din.
- ² Nahallok duon to Magboboot ka otow no nig-ugpo to litos, di pigsamilian ka Magboboot to otow no ogsuwoy-suwoy to daan.
- ³ Ogdabarasan ka poka to angol-angol no otow tongod to mgo kinagian din, di ogkakaasagan ka mougsoob no otow tongod to kandin no igkakagi.

- ⁴ Ko waro igdadaru no karabaw, songo waro igkasunggud to karabaw, di ka dakol no pogga-ani ogligkat to dadyagang to karabaw^c.
- ⁵ Kono oggawoy ka otow no ogpamaugot to litos, di olin do ubat ka ogkagion to otow no kono ogkasaligan.
- ⁶ Kono ogkohimu no mougsob ka otow no ungod ogsuy-at, agad ko og-ol-oog sikandin, di magaan ogpaka-anad ka otow no marodyow so pogsabut.
- ⁷ Dokow ogdumaruma to angol-angol no otow, su waro katagaanan no ogkadinog now no oglibuwas to bobo din.
- ⁸ Mougsob ka marodyow no otow su ogdoromdom sikandin panoy ko nokoy ka oghimuon din, di angol ian ka mgo angol-angol su oggawoy sikandan.
- ⁹ Inat wa do duon to mgo angol-angol ko ogpakasao sikandan, di ogpoomot ka mgo matuarong to pogpokog-uli.
- ¹⁰ Ka goinawa to otow ro ian ka nataga ko nokoy ka igmasakit din, woy songo waro duma no ogpakagoram to igkarago din.
- ¹¹ Okgagugus ka lunggunan to dorooti no otow, di ogtulin ka pog-ugpo to matuarong no otow.
- ¹² Duon daan no naan to otow no litos, dokad di ogdoog naan to kamatadyon.
- ¹³ Ogkapakoy no agad taliwaro to pogngisi duon dod igmasakit to goinawa, woy ogkohimu no ka igkarago kuntoon ogkabawi no igmasakit to goinawa angkuwan.
- ¹⁴ Ogasulian ka ogsuwoy-suwoy no otow tongod to tibon mgo pighimu rin, woy songo ogkadassagan ka marodyow no otow tongod to kandin no pighimu.
- ¹⁵ Ogtuu to agad nokoy ka otow no waro gindawanan, di ogdoromdom panoy ka mougsob no otow ko nokoy ka litos.
- ¹⁶ Oghallok ka mougsob no otow duon to Magboboot woy og-iniugan din ka karootan, di ka angol-angol no otow atag, magaan ogkabou sikandin woy kono ogdoromdom to marodyow.
- ¹⁷ Angol-angol ka mgo hinimuan to otow no magaan ogkabou, woy og-usigon ka otow no ungod oggawoy.

^c14:4 Karabaw: to Hibriu, 'baka' soini, su waro karabaw dio, woy baka ian ka igdadaru no adyam dan.

- ¹⁸ Ka pogka-angol-angol do ka ogkatinawo to otow no waro gindawanan, di ogkadassagan to katagaan ka otow no marodyow to pogdoromdom.
- ¹⁹ Ogluhud ka mgo maroot no otow to tangkaan to mgo marodyow, woy ka mgo dorooti dio to gomawan to mgo matuarong.
- ²⁰ Ogkasamilian ka mgo otow no nawaraan agad to mgo songo baoy ran, di moon-ing ka mgo aukoy to mgo datu.
- ²¹ Ogpakasao ka ogsamili to songo baoy rin, di ogkaboligan ka otow no duon marodyow no goinawa duon to otow no nawaraan.
- ²² Ogpakasuwoy to daan ka mgo otow no ogbabantak to karootan, di ogkasulian pinabadyo to marodyow no goinawa woy pogkasaligan ka mgo otow no ogbabantaan to marodyow.
- ²³ Ko ogpoomot ka ogtarabau, ogtulin ka, di ko ungod ka ro ogkagi, ogkawaraan ka.
- ²⁴ Ogdadassagan ka mougsob no otow pinabadyo to pogkadatu din, di timul no pogka-angol do ka ogkatinawo to mgo angol-angol tongod to ka-angoi ran.
- ²⁵ Ogpakalipuwas to ukul to mgo otow ka ogpamaugot to litos, di ogpakagawoy ka ogpamaugot to ubat.
- ²⁶ Unawa't nig-ugpo to madigon no lunsud ka otow no duon kahallok to Magboboot woy unawa't nig-ugpo ka mgo anak din to aputanan no ilian.
- ²⁷ Unawa't sob sob to koudyagan ka kahallok duon to Magboboot, ogpakapasuwoy sikan to otow puun to lit-ag to kamatadyon.
- ²⁸ Ogmabantug ka hari ko moon-ing ka mgo otow rin, di ko waro sakup din ogkagugus ka pog-ugpo to datu.
- ²⁹ Dakol ka pogsabut to otow no ogpasaad-saad, di ogpakita to ka-angoi rin ka otow no magaan ogkabou.
- ³⁰ Ogmanokal ka lawa ko maawang ka goinawa, di ogkamou ka mgo bokog to otow no ogko-ima.
- ³¹ Ogkasubali ka Magboboot to otow no nig-uang-uang to mgo otow no nawaraan su pighimu sikandan to Magboboot, di pig-ila ka Magboboot to otow no moid-uon to mgo nawaraan.
- ³² Ko oglopow ka igkobaybadyari, ogkangkapood ka mgo dorooti no otow, di agad taliwaro to kamatadyon duon aputanan to mgo matuarong no otow.

- ³³ Nig-ugpo ka kougsoban duon to goinawa to mgo otow no ogpakasabut, woy ogpakakita ka mgo angol-angol to sikan.
- ³⁴ Ogbabantug ka nasud tongod to pogkamatuarong, di ogkasiporan ka koot-otowan tongod to poppakasao.
- ³⁵ Ogkarago ka hari ko duon ogkasaligan no suguanon din, di ogkabou sikandin to suguanon no og-aap to ogpakasipod kandin.

15 ¹ Ogka-awo ka langot ko moumol ka tabak, di ogmoinit pad ka goinawa ko mabuut ka ingkakagi.

- ² Ogbogoy to katagaanan ka mgo kinagian to mgo mougsoob no otow, di waro puus to mgo igpangagi-kagi to mgo angol-angol.
- ³ Nigpipitow ka Magboboot to tibon mgo ugpaan, no pigmolmoogan din ka mgo dorooti woy ka mgo marodyow no mgo otow.
- ⁴ Unawa to kadyu no ogbogoy to koudyagan ka kinagian no ogpokog-uli, di ogko-obuk ka kabaghot tongod to ogpakagaway no kinagian.
- ⁵ Angol-angol ka otow no ogsamili to igsapad to amoy rin, di marodyow ka pogsabut to otow no ogpamminog to ogpakatul-id kandin.
- ⁶ Maddodyow ka mgo kaaglagan duon to baoy to matuarong no otow, di ka ogkoutol to dorooti ogbogoy to kasamuk.
- ⁷ Ogpakatangkap to katagaanan ka mgo kinagian to mougsoob no otow, di kono ogkohimu sikan to mgo angol-angol.
- ⁸ Ogdomotan to Magboboot ka igtaruwoy to mgo dorooti no otow, di ogkarago sikandin ko ogpanubad ka mgo matuarong.
- ⁹ Og-usigon to Magboboot ka mgo daan to dorooti no otow, di dakol ka goinawa rin to mgo otow no ogpamangho to pogkamatuarong.
- ¹⁰ Dakol ka logpad no ogko-im-imaan to otow no ogsuwoy to litos no daan, woy ogkamatoy ka otow no ogsamili to igsapad.
- ¹¹ Ogitoon to Magboboot ka ugpaan to mgo nammatoy on, nokoy naan pad no ogpakakita sikandin to mgo ogdoromdomon to mgo otow.
- ¹² Ogbabou ka taagsuy-at ko ogsaparan sikandin; kono og-inso sikandin to mgo mougsoob.
- ¹³ Ko duon maawang no goinawa, songo duon pogpo-iyum-iyum, di ko duon dakol no igkasasow, ogko-obuk ka kabaghot.

- 14 Katagaan an ian ka ogpamanghoon to otow no duon marodyow no pogdoromdom, di ka igkoiniat to angol-angol no otow ian ka pogka-angol!
- 15 Maroot ladyun ka oggoramon to mgo otow no piglup-lupigan, di inat makoonon ladyun ka pog-ugpo to otow no ungod ogkarago.
- 16 Madmarodyow ko mointok ka kaaglagan nu no duon kahallok to Magboboot woy to otow no dakol ka kaaglagan di songo dakol ka ingkasasow.
- 17 Madmarodyow pad ko ogkoon ki to labay ro duma to mgo indakoli to goinawa ta, woy to ogkoon ki to pinaambog no nati duma to mgo usig ta.
- 18 Ogtimul to kasamuk ka otow no magaan ogkabou, di ogpahagtongon to ogpasaad-saad no otow ka ogpo-og-ogotoy.
- 19 Pigbaabagan to dugion ka daan to poguon no otow, di maawang ka daan to matuarong no otow.
- 20 Ogkarago ka amoy ko mougsob ka anak din, di angol-angol ka otow no ogsamili to inoy rin.
- 21 Ogkarago ka otow no waro marodyow no pogdoromdom to poghimu to igko-angol, di ogpalinggaat no matul-id ka daan to otow no marodyow to pogdoromdom.
- 22 Kono ogpakatood ka pigbantaan ko waro ogtambag, di ko moon-ing ka ogtambag, ogkatood ian sikan.
- 23 Ogkarago ka otow ko duon litos no igtabak din woy marodyow lagboy ka kinagian no kono ogkamoori.
- 24 Unawa't ogpamatikang ka daan to ukul to mougsob no otow odyow kono ogko-uug sikandin dio to lobonganan.
- 25 Oglupoton to Magboboot ka baoy to otow no ogparakol-dakol, di ikannugun din ka oatan to tano to bau.
- 26 Ogdomotan to Magboboot ka mgo sumsumanon to mgo dorooti, di ogkarago sikandin to mgo ogdoromdomon to mgo malinis to goinawa.
- 27 Ogtabaybadyaran ka lunggunan to otow no magolgol, di ogmaadyat ka ukul to otow no ogdomot to ig-adyat no saapi.
- 28 Og-ong-ongoron pad to matuarong no otow ka igtabak din, di ogpangagi-kagion do duon to bobo to dorooti ka maddoot no mgo kinagian.

- ²⁹ Mariu ka Magboboot to mgo dorooti, di ogdinogon din ka mgo igpanubad to mgo matuarong.
- ³⁰ Ogmaawang ka goinawa ta ko ogpakakita ki to langlanguan no narago, woy ogmarodyow ka oggoramon ta ko ogdinogon ta ka marodyow no nangnangonon.
- ³¹ Oghohimu no duma to mgo mougsoob ka otow no ogpamminog to sapad no ogtimul to ukul din.
- ³² Waro goinawa to pogko-otow rin ka otow no kono ogpamminog to insapad kandin, di ogkatimuan ka pogsabut to otow no ogpannalinga to pogpatul-id.
- ³³ Og-anad to kougsoban ka kahallok duon to Magboboot, woy ogpasaad-saad ka otow woy on ogkabantug sikandin.
- 16** ¹ Ogbabantaan ka otow duon to goinawa rin, di ka Magboboot ka ogbogoy to tabak to sikan.
- ² Naan to otow no litos ka tibon mgo oghimuon din, di ka Magboboot ian ka ogpaka-ongod-ongod to mgo tuud din.
- ³ Ibogoy now ka mgo oghimuon now duon to Magboboot, woy ogkatood ka tibon mgo pigbabantaan now.
- ⁴ Duon tuud to Magboboot to tibo no oghimuon din, agad ka allow to poglogpad din to mgo maroot no mgo otow.
- ⁵ Pig-usig to Magboboot ka tibo no ogparakol-dakol. Maugot ian: ogkalogparan ian sikandan.
- ⁶ Pinabadyo to koid-u woy kamaugotan, ogko-ulian ka mgo sao, woy pinabadyo to pogkahallok duon to Magboboot ogpakapamariu ka otow to karootan.
- ⁷ Agad ka mgo usig nu og-aaukuy koikow ko ogkarago ka Magboboot to mgo hinimuan nu.
- ⁸ Madmarodyow ka maintok no puun to pogkamatuaronog woy to dakol no puun to kono'n mahusoy.
- ⁹ Ogbabantaan ka otow duon to goinawa rin ko hondoik sikandin ogdoog, di Ka Magboboot ian ka ogboot to ogkoumaan din.
- ¹⁰ Unawa to nigkagi ka Magboboot ko ogkagi ka hari, woy sikan ian no kono porom sikandin ogkagi to kono'n litos duon to husoy.
- ¹¹ Puun to Magboboot ka litos no gantangan woy kiluhan; woy ogkoiniat sikandin no litos ka pogsokod ta.
- ¹² Og-usigon to mgo hari ka karootan, su ogkarigon do ka pogboboot dan pinabadyo to pogkamatuaronog.

- 13 Ogarago ka mgo hari to ogkagi to kamaugotan; ogkoiniatan dan ka otow no ognangon to litos.
- 14 Ko ogkabou ka hari, duon ogkamatoy, di ogko-im-imuan sikandin to mougsoob no otow.
- 15 Ko ogpo-iyum-iyum ka hari, duon koudyagan; unawa to pigtagaran no uran ka karago to hari.
- 16 Madmarodyow lagboy ka kougsoban woy to bulawan; madmarodyow ko og-aamon ka pogsabut labow to saapi.
- 17 Kono ogdoog to karootan ka daan to matuarong no otow, woy ko ogbantoy ki to daan ta, ogbantadyan ta ka koudyagan ta.
- 18 Oghun-a to pogkagugus ka pogparakol-dakol woy oghun-a to pogkapood ka pogpagarol-garol.
- 19 Madmarodyow ka pog-ugpo no ogpariraom duma to mgo nawaraan woy kono'n ka pogbaad-baad to pig-agow duma to mgo nigparakol-dakol.
- 20 Ogtulin ka otow no ogpannalinga to igtuario, woy ogkaboligan ka otow no ogsalig duon to Magboboot.
- 21 Ogko-ilaan no marodyow to pogdoromdom ka mougsoob no otow, woy ko moumol ka pogpangagi-kagi, ogtulin ka igtuario.
- 22 Unawa to sobsob to koudyagan ka pogsabut duon to nakasabut, di logpad do ka ogkoumaan to ka-angoi to mgo angol-angol.
- 23 Ogpuun to marodyow no goinawa rin ka mgo kinagian to mougsoob no otow, woy ogpakatuaro ka mgo nangnangonon din.
- 24 Unawa to tonob ka moumol no mgo kinagian; moomis oggoramon to goinawa ta woy ogpakatimul to dadyagang ta.
- 25 Duon daan no naan to otow no litos, dokad di ogdoog naan sikan no daan to kamatadyon to koopusan.
- 26 Ogpoomot ogtarabau ka otow odyow no duon ogkatinawo din, su gutasan sikandin.
- 27 Maroot ka ogbantaanon to dorooti no otow, woy unawa't hapuy no ogpakatutung ka mgo kinagian din.
- 28 Og-aap to kasamuk ka ogsuwoy-suwoy no otow, woy ogpakapaluat to mgo aukoy ka otow no ogtaosob.
- 29 Og-adyaton to mabuut no otow ka duma rin, odyow no og-aapon din to daan no kono'n marodyow.

- ³⁰ Duon maroot no tuud to otow no ogsingyas to mata rin woy bobo din.
- ³¹ Unawa't indanan to kabantug ka uu no ubanon; ogkapurut sikan to poghipanow to daan to pogkamatuarong.
- ³² Madmarodyow to mabuut no otow ka otow no mananoy ogkabou, woy marodyow pad to otow no ogklusud to lunsud ka otow no ogpakaponod to goinawa rin.
- ³³ Ogtimao ka mgo otow di ka Magboboot ian ka ogboot ko nokoy ka tabak.
- 17** ¹ Madmarodyow ko mundu do ka ogkoonon ko duon maawang no goinawa, woy ko duon pogkoonan to baoy no naponu to pogpo-og-ogotoy.
- ² Oghohimu no igbudyag to makasisipod no anak ka mougsob no suguanon, woy ogpakalagkos sikandin to pogpanugun-tugun duma to mgo anak to igbudyag din.
- ³ Ogko-ol-oogan ka karodyowan to bulawan woy plata pinabadyo to hapuy, di ka Magboboot ian ka og-ol-oog to goinawa to otow.
- ⁴ Ogpamminogon to dorooti no otow ka mgo maroot no kinagian, woy ogpamminogon to ubaton no otow ka mgo kinagian no ogpakagawoy.
- ⁵ Unawa't pigsamilian ka Magboboot to otow no ogsuy-at to mgo otow no nawaraan su pighimu sikandan to Magboboot; kono ogpakabutuas to logpad ka otow no ogkarago to pogpitow to igkobaybadyari to duma.
- ⁶ Igkabantug to mgo budyag ka mgo apu dan, woy songo igkabantug to mgo anak ka mgo amoy woy inoy ran.
- ⁷ Maroot pamminogon ka ogparakol-dakol no mgo kinagian duon to bobo to angol-angol no otow; labow pad no maroot ka mgo ubat duon to igbudyag.
- ⁸ Unawa't tagonlomu ka igbogoy duon to pogdoromdom to nigbogoy su agad hondo sikandin ogdoog, ogpakatood sikandin.
- ⁹ Ogpatulín to marodyow no goinawa ka otow no ogbunbun to sao, di ogpakaluat to mgo aukoy ka otow no ogpatangkap to sikan no sao.
- ¹⁰ Kono ogkatul-id ka angol-angol no otow agad ko ogkabarasan to songo gatus no lampos, di ogka-anad ka mougsob no otow agad ko ogsaparan do.

- 11 Pog-atu ro ian ka tuud to dorooti no otow; no sikan ian ogkapa-aapan sikandin to taagnangon no waro koid-u.
- 12 Madmarodyow ko ogpakatomu ka to mabuut no magintaunan^dno pig-agowan to mgo anak din, woy to pogtomu nu to angol-angol no otow no nighimu to inkaangoi rin.
- 13 Ko ogsulian nu to maroot ka marodyow, kono ogka-awo ka karootan to lunggunan nu taman to katamanan.
- 14 Ka pogbunsud to pog-ogot unawa to poghuwang to tambon no konad ogpakaibong ka woig; no sikan ian, hagtong ka ro odyow kono ogkabunsuran ka kasamuk.
- 15 Ogkabou ka Magboboot ko ogkalokaan ka nakasao, woy songo ogkabou sikandin ko ogpasao-on ka waro makasao.
- 16 Waro puus to saapi duon to boad to angol-angol no otow, su kono ogkoiniat sikandin to poggamit to sikan pogpurut to kougsoban.
- 17 Agad nokoy ka oglopow, ogpalinggaat ka marodyow no goinawa to maugot no aukoy, woy pighimu ka suod odyow to pogbulig to koirapan.
- 18 Waro marodyow no pogsabut to otow no og-abin to utang to duma no ogpangulibot no ogbadyaran din.
- 19 Sao naan ka ogkoiniatan to otow no ogkoiniat to pog-atu. Nigpamangho to ogkagugus to pog-ugpo ka otow no ogparakol-dakol.^e
- 20 Kono ogtulun ka otow no ogsuwoy-suwoy to goinawa; ogkalopowan to igkobaybadyari ka otow no ubaton.
- 21 Igmasakit to goinawa ka anak no waro aporu, woy waro karago to amoy to angol-angol no anak.
- 22 Unawa to marodyow no tambal ka karago to goinawa, di puunan to dau ka nigtawad no goinawa.
- 23 Ogtinawoon to dorooti no otow ka hinoos no saapi odyow to poghutuk to litos no husoy.
- 24 Ungud ogpamitow to kougsoban ka otow no duon marodyow no pogsabut, di ungod oghalin-halin ka pogpitow to mgo mata to angol-angol no otow.
- 25 Igmasakit to goinawa ka ighatod to anak no angol-angol duon to amoy rin woy lagboy no igmasakit duon to inoy rin.

^d17:12 Magintaunan: to duma no kinagian 'oso' woy ko 'bear'. Dakol no mabuut no magintaunan sikan.

^e17:19 Nigparakol-dakol: to Hibriu 'nighimu to dakol no lokob'.

- ²⁶ Kono'n marodyow ko oglogparan ka otow no waro makasao, woy maroot ko ogbarasan ka mgo duon katondanan tongod to poghimu ran to litos.
- ²⁷ Ogponoron to mougsoob no otow ka mgo kinagian din, woy kono ommagaan ogkabou ka otow no duon pogsabut.
- ²⁸ Agad ka angol-angol no otow ogdoromdomon no mougsoob ko waro kagi rin, woy ogdoromdomon sikandin no marodyow to pogsabut ko ogponoron din ka dilo din.
- 18** ¹ Kandin do no karodyowan ka ogdoromdomon to otow no kono og-amut-amut to duma; ogligalon din ka tibon marodyow no tambag.
- ² Kono ogkarago ka angol-angol no otow to pogsabut; ian do ogkoiniatan din ka pognangon-nangon to nadoromdoman din.
- ³ Ko ogkohimu ka no dorooti, ogkasamilian ka, ogkasiporan ka woy ogka-awo ka kabantug nu.
- ⁴ Ka mgo kinagian to otow unawa to maraom no mgo woig, woy unawa to sobsob no ogtu-aug to kougsoban.
- ⁵ Maroot to husoy ko ogbuligan ka otow no dorooti woy ko ogbaabagan ka otow no waro sao.
- ⁶ Ogbabaybadyaran ka angol-angol no otow tongod to mgo ingkakagi rin, woy ogkabarasan sikandin tongod to mgo innangon din.
- ⁷ Ogpapood ka angol-angol no otow tongod to mgo ingkakagi rin, woy ogkalit-ag sikandin tongod to mgo innangon din.
- ⁸ Unawa to managomnom no ngaap ka mgo kinagian to otow no ogtaosob, woy ogsood sikan to diraom to otow.
- ⁹ Suod to taaggugus ka otow no poguon to tarabau rin.
- ¹⁰ Unawa't marigon no aputanan ka Ngaran to Magboboot; ogpanlaguy ka mgo matuarong duon woy kono ogka-amonu sikandan.
- ¹¹ Ka saapi to mgo datu ian ka ilian dan; naan dan no kono ogkoumaan sikandan duon.
- ¹² Ko ogparakol-dakol ka otow duon to goinawa rin, ogkapood sikandin; woy on ogkabantug ka otow ko ogpasaad-saad sikandin.
- ¹³ Angol-angol woy makasisipod ka otow no ogtabak to kono pad ogpamminog.

- ¹⁴ Ogkoulian ka otow to dau ko duon pad marodyow no pogdoromdom din, di kono ogkoulian sikandin ko warad on pog-iman-iman din.
- ¹⁵ Katagaanan ka ogpuruton to otow no duon marodyow no pogdoromdom; woy sikan do ka ogpamminogon to mgo talinga to mougsob no otow.
- ¹⁶ Ogpakapuwas to gomawan ka igbogoy, woy ogpakamarani ka nigbogoy duon to mgo mabantug.
- ¹⁷ Inat litos ka an-anadyan no otow no ogkagi to husoy taman to duon dangob no og-inso-inso kandin.
- ¹⁸ Ogkohusoy ka pogpo-og-ogotoy pinabadyo to timaofwoy ogpo-onong-onong on ka mabbuut no mgo usig.
- ¹⁹ Kono og-ituos ka suod no nasao-an unawa't lunsud no kono ogkalusuran su piglingkusan to aad no batu. Songo makogal oghusadyon ka mgo pogpo-og-ogotoy unawa't to madigon no lokob to aputanan no kono ogkasooran.
- ²⁰ Ko nokoy ka ig-orok to bobo to otow ian dod ka ogga-anion din; ko marodyow ka ogkagion din, marodyow ka ogkapurut din.
- ²¹ Duon kabogbogan to koudyagan woy kamatadyon duon to bobo to otow; ogkoonon to matao no otow ka bogas to ingkakagi rin.
- ²² Marodyow ka ogkitoon to otow no ogpakakita to asawa, woy ogpakatinawo sikandin to karodyowan puun to Magboboot.
- ²³ Ogpoid-uhoid-u ka otow no nawaraan ko ogkagi sikandin, di mabbuut ko ogtabak ka naruonan no otow.
- ²⁴ Duon otow no moon-ing ka aukoy, di kono ogbulig sikandan to koirapan, di duon aukoy no madmarodyow pad to suod no kono ogloko.
- 19** ¹ Madmarodyow ka otow no nawaraan no waro ikasawoy woy to angol-angol no otow no ogsuwoy-suwoy to kinagian.
- ² Kono'n marodyow ko duon kabaghot di waro katagaanan, woy songo kono'n marodyow ko og-agpas-agpas no ogsuwoy to daan.
- ³ Okgagugus ka pog-ugpo to otow tongod to pogka-angol-angol din, di ogsonditan din ka Magboboot duon to goinawa rin.

^f18:18 Timao: To pogtimao dan kai to Biblia og-umawon pad ka Magboboot to pogbogoy to litos no tabak; kono'n mgo busow ka og-umawon dan.

- ⁴ Moon-ing ka mgo aukoy nu ko ogkaruonan ka, di ogkoongkoran to aukoy rin ka otow no nawaraan.
- ⁵ Ogkalogparan ian ka otow no ogpamaugot to ubat, woy ogkakalabusu ka otow no ogmang-uubat.
- ⁶ Moon-ing ka og-ol-oog no ogdani to sagboka no igbudyag, woy ogkohimu no aukoy to tibo ka otow no mabogoy-bogoy.
- ⁷ Og-iniugan to mgo karumahan din ka otow no nawaraan – labow pad no ogpamariu ka mgo aukoy rin kandin! Agad ko oggaponon din sikandan no ogpakoid-u, kono din ogkakitaan sikandan!
- ⁸ Pigbantadyan din ka kandin do no ukul ka otow no ogpurut to kougsoban; ogtulin ka otow no ogkannugun to pogsabut.
- ⁹ Kono ogpakabutuas to logpad ka otow no ogpamaugot to kono'n litos, woy ogkamatoy ka otow no ungod og-uubat.
- ¹⁰ Kono'n litos ko duon angol-angol no otow no matubung to pog-ugpo – labow pad ko duon uripon no ogsugu to mgo anak to datu.
- ¹¹ Mananoy ogkabou ka otow tongod to kougsoban din; kabantug din ian ko ogbaagaron ka og-atu kandin.
- ¹² Unawa't hinigol to lion⁸ka kabou to hari, di ka karago din unawa't domhug duon to lagut.
- ¹³ Okgagugus ka pog-ugpo to amoy ko duon angol-angol no anak din, woy unawa't tuu-tuu no woig no kono oghagtong ka igboi no ungod og-atu.
- ¹⁴ Ogkatinawo ta ka mgo baoy woy saapi puun to mgo amoy ta, di puun to Magboboot ka asawa no marodyow to pogdoromdom.
- ¹⁵ Oghohirogo ka otow no poguon woy oggutasan ka otow no kono ogwoil.
- ¹⁶ Pigbantadyan ka ukul din to otow no ogpanalinga to mgo igtuario, di ogkamatoy ka otow no ogbaagad to daan din.
- ¹⁷ Iing to nigpasamboy ka to Magboboot ko ogbulig ka to mgo nawaraan, woy ka Magboboot ian ka ogdassag koikow tongod to pighimu nu.
- ¹⁸ Sapari nu ka anak nu, odyow no duon marodyow no pog-iman-iman; doka'g hoo to kamatadyon din.

⁸19:12 Lion; Dakol no adyam soini duon to koilawan no unawa't meow pitawon di malmaintok naan do to kuddo. Ogpakahimatoy to otow soini no ogdawion din.

- 19 Litos no oglogparan ka otow no magaan ogkabou; ko
ogpangabangan nu sikandin kuntoon, oghutuk pad asoom.
- 20 pamminogi nu ka tambag woy tinawaa nu ka igtuaro, woy to
kaugadyan ogmougsob ka.
- 21 Moon-ing ka mgo pigbabantaan to goinawa to otow, di ka tuud
to Magboboot ian ka ogkatood.
- 22 Ka ogkoiniatan to mgo otow ian ka goinawa no ogkasaligan^h;
madmarodyow ka otow no nawaraan woy to ubaton.
- 23 Ogdoog to koudyagan ka kahallok duon to Magboboot:
ogpakahimooy ka no nabuung, no waro igkobaybadyari.
- 24 Igsood to poguon no otow ka boad din duon to padyo di kono
din oghonaton poglibong to bobo din!
- 25 Ko ogkabarasan ka taagsuy-at ogpaka-anad to marodyow no
pogdoromdom ka mgo otow no waro gindawanan; ko
ogkasaparan ka otow no ogpakasabut, ogkatimuan ka
katagaanan din.
- 26 Ka otow no ogtakow puun to amoy rin woy ka ogdogil to inoy
rin ian ka anak no og-aap to kasiporan.
- 27 Anak, ko oghagtong ka to pogpamminog to igtuaro,
ogpakasuwoy ka puun to mgo kinagian to katagaanan.
- 28 Ogsamilian ka litos no husoy to otow no ogpamaugot to ubat,
woy inat ian do inomon to dorooti no otow ka karootan.
- 29 Pig-indanan panoy ka iglogpad to mgo taagsuy-at, woy mgo
igbaras to mgo poka to mgo angol-angol.
- 20** 1 Ogdoog to pogsuy-at ka pog-inom to binu, woy ogdoog
to ogpasun-suntutokoy ka pog-inom to ogpakalasing; kono'n
mougsob ka otow no ogkapood tongod to sikan.
- 2 Unawa't hinigol to lionⁱka kabou to hari; ogkamatoy ka otow no
ogpukow to kabou din.
- 3 Ogbabantug ka otow ko ogpamariu sikandin to pogpo-og-ogotoy,
di magaan do ogpokog-ogot ka angol-angol no otow.
- 4 Kono ogdadaru ka poguon no otow to litos no buwan; nokoy naan
no to tinggaani ogpamangho sikandin, di waro ogkitoon
din.

^h19:22 Ka.....ogkasaligan; kono'n klaru to Hibriu. Dangob no hokad 'Makasisipod ko duon otow no magolgol.'

ⁱ20:2 Lion; Dakol no adyam soini duon to koilawan no unawa't meow pitawon di malmaintok naan do to kuddo. Ogpakahimatoy to otow soini no ogdawion din.

- ⁵ Unawa't woig duon to maraom no balun ka mgo doromdomon to goinawa to otow, di ogkasakug sikan to otow no duon pogsabut.
- ⁶ Moon-ing ka og-abin no kono ogkatampod ka dakol no goinawa ran, di hontow ka ogpakakita to otow no ogkasaligan?
- ⁷ Waro ikasawoy to pog-ugpo to matuarong no otow; ogkaboligan ka mgo anak din puun kandin.
- ⁸ Ko ogpinnuu ka hari to husadyanan ogpaadyapon din ka karootan pinabadyo to ogpitow rin.
- ⁹ Hontow buwa ka ogpakanangon "In-oog ku ka goinawa ku no waro amut no karootan; malinis a no waro sao"? Waro ian!
- ¹⁰ Ogdomotan to Magboboot ko kono'n unawa ka kabogatan to pogboli woy ka kabogatan to pogbaligyo, songo ogdomotan din ko loin ka gantangan to pogboli woy ka gantangan to pogduad.
- ¹¹ Agad ka bato ogko-ilaan pinabadyo to mgo hinimuan din; ko marodyow woy ko litos ka pog-ugpo din.
- ¹² Ogpamminog ki woy ogpitow ki porom su pighimu to Magboboot ka mgo talinga woy mgo mata ta.
- ¹³ Doka'g koiniat to og-ungud oghirogo su ogkawaraan ka; himata ka odyow no kono ka ogkoubusan to koonon.
- ¹⁴ Kagi to ogboli duon to tindira "Maroot soini, maroot!" dokad di pog-uli ogpagarol sikandin tongod to pigboli rin.
- ¹⁵ Dakol ka bulawan, woy moon-ing ka mgo mahalon no batu, di manalimboka ro no alahas ka mgo bibig no ogkagi to katagaanan.
- ¹⁶ Tinawaa nu ka kinabo no igpamaugot to otow no ogbadyaran din ka utang to dagpu, woy puruta nu ian ko oghimuon din to utang to agkadyon no boi.
- ¹⁷ Inat moomis ka koonon no napurut to otow pinabadyo to gawoy, di to kaugadyan unawa't badyokbok do ka duon to bobo din.
- ¹⁸ Ko duon ogbantaanon nu, pamudyu ka to tambag; ko ogbunsud ka no ogmangadyow, pamanghoa nu ka ogpakatuon koikow.
- ¹⁹ Ogpuwasan to wangaon no otow ka ighoos no kinagian; no sikan ian no kono ka ogdumaruma to otow no ungod ogkagi.
- ²⁰ Ko ogtungadyowon to otow ka amoy woy ko inoy rin, ogkoobukan ka ilawan din to dooman.

- ²¹ Ka igtugun-tugun no og-agpason to pogpurut kono ogkaboligan to kaugadyan.
- ²² Doka'g nangun “Ogsulian ku sikoikow to soini no sao nu!”
Tagari nu ro ka Magboboot woy ogkapangabangan ka rin.
- ²³ Ogdomotan to Magboboot ka kono'n unawa no kabogat to pogboli woy to pogduad, woy kono ogkarago sikandin to kono'n litos no sokoranan.
- ²⁴ Ka Magboboot ian ka ogboot to daan ta; no sikan ian no kono ki ogpakasabut to ogbadyaan ta.
- ²⁵ Ogkalit-ag ka otow no magaan ognangon no duon igbogoy rin to Magboboot no angkuwan do ogdoromdomon din ko nokoy ka inpangulibot din.
- ²⁶ Ogpasirion to mougsob no hari ka mgo dorooti no otow; ogdi-diokan din sikandan.
- ²⁷ Ogtong-awan to Magboboot ka goinawa to otow; ogmoog-moogan din ka kinaoaman to ogdoromdomon ta.^j
- ²⁸ Ogekakaasagan ka hari pinabadyo to dakol no goinawa woy pogkasaligan; ogkadigonan ka pogkahari din pinabadyo to koid-u.
- ²⁹ Ka kanokal dan ian ka kabantug to mgo baubato pad, woy ka mgo uban dan ian ka kabantug to mgo budyag.
- ³⁰ Ogka-awo ka karootan to otow pinabadyo to poglampos.
- 21** ¹ Ka Magboboot ian ka niggon-gon to goinawa to hari; sikandin ka ogboot ko hondo ogdoog sikan unawa't pogboot din to pogpatu-aug to mgo woig.
- ² Inat litos to otow ka tibo no oghimuon din, di og-ong-ongoron to Magboboot ka goinawa to otow.
- ³ To pogpitow to Magboboot, madmarodyow to pogtubad ka poghimu to litos woy to mahusoy.
- ⁴ Sao ka pogparakol-dakol no pogpitow woy ka goinawa no ogpagarol-garol. Sikan ka ogko-ilaan ta to dorooti no otow.
- ⁵ Ogtulin ka ogpoomot no otow puun to marodyow no pogbabantaan din, woy ogkawaraan ka otow no og-agpas-agpas.
- ⁶ Ogka-awo unawa't saagapun to masoom ka saapi no ogkapurut pinabadyo to ubat, woy ogkohimu no lit-ag to nigpurut.

^j20:27 Dangob no hokad: 'Ka goinawa to otow ian ka ilawan to Magboboot; ogtongowan to sikan ka kinaoaman to goinawa to otow.'

- ⁷ Ogka-awo ka mgo dorooti no otow pinabadyo to kabuuti ran, su ogligal sikandan to poghimu to matuarong.
- ⁸ Ogsuwoy-suwoy ka daan to otow no nakasao, di waro igkasawoy to pog-ugpo to otow no waro makasao.
- ⁹ Madmarodyow no og-ugpo ka no sagsagboka duon to pinadyag^kwoy to pog-ugpo nu to baoy duma to asawa no unguud ogpang-ogot.
- ¹⁰ Karootan ian ka ogko-ibogan to dorooti no otow; agad ka songo baoy rin kono din ogkoid-uan.
- ¹¹ Ogkaanad to kougsoban ka mgo otow no waro gindawanan ko ogkalogparan ka taagsuy-at no otow, woy ogkatimuan ka katagaan to mougsob no otow ko ogkanangonan sikandin.
- ¹² ogpitawon to Magboboot no Matuarong ka lunggunan to mgo dorooti no otow woy igbogoy rin to karootan ka dorooti no mgo otow.
- ¹³ Ko kono ogpamminogon to otow ka pogpakoid-u to mgo nawaraan, songo ogpakoid-u sikandin woy waro ogtabak kandin.
- ¹⁴ Ko duon igkabogoy nu to hoos duon to otow no nabou, ogkabohow ka moinit no goinawa rin koikow.
- ¹⁵ Ogkarago ka mgo matuarong ko litos ka husoy, di ogkahallok on ka mgo otow no ogsasao.
- ¹⁶ Ogpaka-agpot to mgo otow no namatoy on ka otow no ogpakasuwoy puun to daan to pogsabut.
- ¹⁷ Ogdawaraan ka otow no duon dakol no goinawa to karagoanan; woy kono ogkaratu ka otow no duon dakol no goinawa to mgo mahal no inumon woy koonon.
- ¹⁸ Ka mgo dorooti no otow ian ka ogpakabadyad liwan to mgo matuarong, woy ka mgo kono ogkasaligan liwan to mgo ogkasaligan.
- ¹⁹ Madmarodyow ko og-ugpo ka duon to han-hanawan woy to pog-ugpo nu duma to unguud ogpang-ogot woy arason no asawa.

^k21:9 Pinadyag: Nignangon ka Hibriu to 'Og-ugpo ka to ampow to atop' su nokani nighimu sikandan to pinadyag no sumpul to baoy ran duon to atop no kono'n masandig.

- ²⁰ To baoy to mougsoy no otow, duon ingkannugun no maddodyow no sora woy mantika, di og-ubuson to angol-angol no otow ka tibo no duon to kandin.
- ²¹ Kouadyagan, pogkamatuaronog woy kabantug ian ka ogkakitaan to otow no ogpamangho to pogkamatuaronog woy to kono ogkatampod no koid-u.
- ²² Ogdalusuran to mougsoy no otow ka lunsud to mgo mabantug no otow, woy ogkagugus din ka madigon no aputanan no pigsaligan dan.
- ²³ Ogpakapamariu to igkobaybadyari ka otow no ogbantoy ko nokoy ka ogkagion to bobo din.
- ²⁴ Taagsuy-at ka otow no ogparakol-dakol woy ogpagarol-garol; nigdoromdom sikandin no sikandin ian ka dorodyawi.
- ²⁵ Ogdoog to kamatadyon ka ogko-ibogan to poguon no otow su ogligal sikandin to pogtarabau, ²⁶ ungod ogko-ibog sikandin no ogkatimuan pad, di ogbogoy ka matuarong no otow no kono oglogod-logod.
- ²⁷ Igkarooti ka igtubad to mgo dorooti no otow, labow pad ko maroot ka tuud to nig-aap.
- ²⁸ Ogdamatoy ka otow no ogpamaugot to ubat, di ogparagas taman to katamanan ka kinagian to otow no ogpanalinga to kamaugotan.
- ²⁹ Ogpa-am-amangkua ka dorooti no otow, di ogdoromdomon panoy to matuarong no otow ko nokoy ka oghimuon din.
- ³⁰ Waro kougsoban, waro katagaanan woy waro pigbabantaan no ogpakatood ko ogpaka-atu sikan to Magboboot.
- ³¹ Oghimporon panoy to mgo otow ka mgo og-unturan dan no mgo kuddo to ogmangadyow, di ka Magboboot ian ka ogboot ko hontow ka ogpakaroog.

22 ¹ Ogdoiniatan ta porom ka marodyow no ngaran labow to saapi; madmarodyow ka pogtahud woy to bulawan woy to plata.

² Un-unawaro ka datu no otow woy ka nawaraan su pighimu sikandan tibo to Magboboot.

³ Ogditoon to otow no marodyow to ogdoromdom ka igkobaybadyari no ogdatong woy ogpa-apat panoy sikandin, di ogparagas do duon ka mgo otow no waro gindawanan, woy ogkabaybadyaran sikandan.

- ⁴ Ka bogas to pogpasaad-saad woy to pogkahallok duon to Magboboot ian ka saapi, ka kabantug woy ka koudyagan.
- ⁵ Moon-ing ka mgo dugi woy lit-ag duon to mgo daan to dorooti no otow, di ogpakapamariu to sikan ka otow no ogbantoy to pogko-otow rin.
- ⁶ Anara nu ka bato to litos no daan, woy ko dakol on sikandin kono ogpakasuwoy sikandin to sikan.
- ⁷ Ogboot ka mgo datu to mgo nawaraan, woy ogkohimu no uripon to nigpasamboy ka nigsamboy.
- ⁸ Oggaani to igkobaybadyari ka otow no og-orok to karootan, woy ogkatampod ka kabuuti rin.
- ⁹ Ogbaboligan ka otow no mabinogadyon, su pigtaaran din ka mgo nawaraan to koonon din.
- ¹⁰ Ko ogkarogil ka taagsuy-at no otow, ogka-awo ka kasamuk; warad on ogpoog-ogotoy woy warad ogkasiporan.
- ¹¹ Oghohimu no aukoy to hari ka otow no ogkoiniat to goinawa no waro igkasawoy, woy moid-uon to pogkagi.
- ¹² Ogbantadyan to Magboboot ka katagaanan, di ogbaabagan din ka mgo kinagian to mgo otow no ogsuwoy-suwoy.
- ¹³ Kagi to poguon no otow to “Kono a oglibuwas, su duon Lion to libuwasan!” woy “Oghohimatadyan a duon to kalasara.”
- ¹⁴ Unawa to tiklobu ka mgo ig-adyat no kinagian to agkadyon no boi; ogko-uug duon ka otow no pig-ogotan to Magboboot.
- ¹⁵ Duon pogka-angol taan to goinawa to bato, di ogka-awo sikan pinabadyo to baras no ogsapad.
- ¹⁶ Ogdawaraan to kaugadyan ka otow no og-uang-uang to mgo otow no nawaraan odyow to pogtimul to saapi din, woy songo ogdawaraan to kaugadyan ka otow no ogbogoy to mgo igbogoy to mgo datu.
- ³⁰ no Igtuaro to mgo Mougsob
- ¹⁷ pamminog ka woy pannalinga ka to mgo igtuaro to mgo mougsob; woy limura nu to goinawa nu ka mgo ig-anad ku,
- ¹⁸ su marodyow ka oggoramon nu ko ogkatantanuran nu sikan duon to goinawa nu, woy ogkagion nu ladyun.
- ¹⁹ Og-anaron ku sikoikow kuntoon, odyow no ogsaligan nu ka Magboboot.
- ²⁰ Pigsulatan ku sikoikow to soini no katouan no igtuaro, no igkakagi to tambag woy katagaanan, ²¹ odyow og-anaron ka

to litos woy ogkasaligan no mgo kinagian odyow no duon marodyow no igtabak nu to ogpa-aap koikow.

-1-

²² Dokow oglo-loiga ka mgo nawaraan tongod su waro ogkohimuran, woy dokow og-ul-uangi ka mgo nawaraan duon to husoy, ²³ su ka Magboboot ian ka ogpanabang tongod kandan, woy oghawion din to pog-agow ka nig-agow to nawaraan.

-2-

²⁴ Doka'g usi-usi to otow no moinit so uu, doka'g dumaruma to otow no magaan ogkabou, ²⁵ su ogka-anaran nu ka mgo daan din woy ogkalit-agan ka.

-3-

²⁶ Doka'g pangulibot no ogbadyaran nu ka utang to dangob no otow, ²⁷ su ko waro igkobadyad nu, agad ka ikam nu oghusuron duon to koikow!

-4-

²⁸ Doka'g woila ka taan no indanan to oatan to tano no impos-ok to mgo kabuybudyagan now.

-5-

²⁹ Pitowa nu ka mapandoy no otow; kono ogpakasugu kandin ka otow no waro ngaran, ian do ogpakasugu kandin ka mgo hari.

-6-

23 ¹ Ko ogpinnuu ka to pogkoon duma to sagboka no igbudyag, indani nu ko nokoy ka duon to longod nu ² woy gotgota nu ka liog nu ko magolgol ka ogkoon. ³ Doka'g koibog to mgo in-aam no mgo ngaap din, su ogkagawadyan ka to sikan no koonon.

-7-

⁴ Doka'g hiboadya ka lawa nu to pogpo-omot odyow ro no ogkaruonan ka; hagtong ka tongod to kougsoban nu. ⁵ Hoo su to songo pogpoo-poo do ogka-awo ka saapi; og-unawa to banug no ogboko to pakpak din no ogpamariu duon to langit.

-8-

⁶ Doka'g koon to pogkoon to logoron no otow, doka'g koibogi ka maddodyow no mgo pogkoon din, ⁷ su sagboka no otow sikandin no ungod ogkaraatan to pogdoromdom to

ingkabadyad din. Okgagi sikandin to “Inom ka. Koon ka,”
di waro inparuma ka goinawa rin to ingkagi rin koikow.

⁸ Mangkuwan og-iilobon nu ka maintok no pigkoon nu, woy
indaat nu ro ka mgo ingkasadyo nu kandin.

-9-

⁹ Doka'g kagi duon to angol-angol no otow, su ogsamilian din ka
kougsohan to mgo kinagian nu.

-10-

¹⁰ Doka'g halina ka taan no indanan to oatan to tano, woy doka'g
agowa ka tano to mgo ilu, ¹¹ su manokal ka Taagpangabang
kandan; og-atuan ka rin tongod kandan.

-11-

¹² Dakola nu ka goinawa nu to mgo igtuario, woy dorodyowa nu to
pogpamminog to katagaanan.

-12-

¹³ Doka'g ul-uungi to pogsapad to bato; ko ogbarasan nu sikandin
kono ogkamatoy sikandin. ¹⁴ Anara nu sikandin pinabadyo
to pogbaras odyow ogkapangabangan nu ka gimukud din
puun to kamatadyon.

-13-

¹⁵ Anak ku, ogkarago ka goinawa ku ko duon mougsohan no goinawa
nu. ¹⁶ Okgukuus ka kinaraoman to goinawa ku ko ogkagi ka
to litos.

-14-

¹⁷ Doka'g pauguti ka goinawa nu to pogko-ibog to pog-ugpo to
mgo makasasao, di ikannugun nu ladyun ka pogkahallok
to Magboboot. ¹⁸ Ko sikan ka oghimuon nu, duon
marodyow no ogko-im-imaan nu woy kono ogkatampod
ka pigtatagan nu.

-15-

¹⁹ Anak, pamminog ka woy ogmougsohan ka, woy ogpalingaat ka
goinawa nu to litos no daan. ²⁰ Doka'g agpot to mgo otow
no og-inom to dakol woy no ogpatamantaman to pogkoon
to saapu, ²¹ hoo su ogkawaraan ka mgo otow no ungod
ogkalasing woy mgo magolgol, woy ogkokohig-bit naan do
ka ogkinaboon dan tongod to kapogul dan.

-16-

²² Pamminog ka to amoy nu no ian ka puunan to koudyagan nu,
woy doka'g lomoti ka inoy nu ko budyag on sikandin.

²³ Boli ka to kamaugotan woy doka'g duara sikan; puruta nu ka kougsoban, ka pogponod to pog-ugpo woy ka pogsabut.

²⁴ Ogkarago lagboy ka amoy to sagboka no matuarong no otow; igkarago to otow ka anak din no duon kougsoban.

²⁵ Ogkarago porom ka amoy woy ka inoy nu; ogkukuus to karago porom ka nig-anak koikow.

-17-

²⁶ Anak, pannalinga ka koddi, woy molmoogi nu ka mgo daan ku

²⁷ su unawa't maraom no bangaug to balun ka agkadyon no boi, woy ka masuwadyon no asawa. ²⁸ Oggopas sikandin unawa't mabuut no otow no ogpamoon-ing to mgo makasasao taliwaro to koot-otowan.

-18-

²⁹ Hontow ka duon igkobaybadyari? Hontow ka duon igmasakit

to goinawa? Hontow ka duon poog-ogotoy? Hontow ka ogmugung-mugung? Hontow ka namali-palian no waro puus? Hontow ka duon malaab no mata? ³⁰ Ian ka mgo ogmaugoy to pog-inom to binu, no og-ol-oog to kalkalasi no ogpakalasing.

³¹ Doka'g pipitow to binu no malaab woy maadyag duon to boung. Magaan do og-aboongon sikan, ³² di to kaugadyan ogkagat sikan unawa't uod; ogkohiluan ka unawa't pigsakmag ka to mammiloy. ³³ Ogpakakita ka to ogpakataap woy ogkaguligow ka sumsumanan nu. ³⁴ Ogkounawa to nokohirogo ka to bautu taliwaro to mgo luwak no mabolbol. ³⁵ Ogkagi ka to “Pigsuntuk a ran, di waro a masakiti! Pigbarasan a ran, di waro a niggoram! Kon-u a ogpakahimata odyow no ogpoko-inom a oghutuk?”

-19-

24 ²⁴¹ Doka'g ka-ima to mgo dorooti no otow, doka'g koiniat to pogdumaruma kandan, ² su ogbabantaan sikandan duon to goinawa ran to pogpasakit, woy ogmanang-nangonoy sikandan tongod to poghimu to samuk.

-20-

³ Ogkapos-ok ka baoy pinabadyo to kougsoban woy ogkadigonan sikan pinabadyo to pogsabut; ⁴ ogkaponu ka mgo sinabong to marodyow woy manalimboka no kaaglagan pinabadyo to katagaanan.

-21-

- ⁵ Mabogbog ka mougsoob no otow, woy ogmanokal ka otow no duon katagaanan; ⁶ kono ka ogpakamangadyow ko waro og-anad woy kono ka ogpakarooog ko waro ogtuaro.
-22-
- ⁷ Kono ogkatogkad to angol-angol no otow ka kougsoban; waro igkakagi rin to limuranan to mgo igbudyag.
-23-
- ⁸ Okgangaranan no masamuk ka otow no ogbabantaan to karootan.
⁹ Sao ka mgo angol-angol no pigbabantaan, woy ogdomotan to tibo ka taagsuy-at no otow.
-24-
- ¹⁰ Maintok naan ka dadyagang nu ko ogmaotoy ka to allow to koirapan.
-25-
- ¹¹ Pangabangi nu ka pigganoy pohondio to kamatadyon; woy ponora nu ka mgo otow no ogka-pood-pood paroog to pogkamatoy. ¹² Ko ognangon ka to “Waro koy mataga,” naan nu buwa no waro mataga ka Magboboot to maugot su og-ong-ongoran din ka goinawa to otow? Ogbabantadyan din ka tibon pog-ugpo nu no sikan ian no ogkataga sikandin to tibo. Naan nu buwa no kono din ogsulian ka tibo no pighimu to kara sagboka?
-26-
- ¹³ Anak, koona nu ka tonob, su marodyow sikan. Moomis ian ka tonob duon to dilo nu. ¹⁴ Songo moomis oggoramon to goinawa nu ka kougsoban; ko ogkakita nu sikan, duon marodyow no ogko-im-imaan nu to uromo woy kono ogkatampod ka tipouri nu.
-27-
- ¹⁵ Doka'g iing to dorooti no otow no oggopas to libuwasan to baoy to matuarong no otow; doka'g panakow duon to ugpaan din, ¹⁶ su agad ko ogkapood ka matuarong no otow to kapapitu og-onow sikandin oghutuk, di ogpakahibat ka dorooti no otow to koirapan no konad ogpaka-onow.
-28-
- ¹⁷ Doka'g kuus ko ogkapood ka usig nu; doka'g karago ko ogpakarogpak sikandin, ¹⁸ su ogkitoon ka to Magboboot woy kono ogkarago sikandin koikow woy og-iniugan din ka kabou din to usig nu.

-29-

¹⁹ Doka'g kasasow tongod to mgo dorooti no otow, woy doka'g ko-ima to pog-ugpo to mgo maroot, ²⁰ su waro ogko-im-imaan to uromo to dorooti no otow. Oggakaparang ka ilawan to mgo maroot.

-30-

²¹ Anak, tahura nu ka Magboboot woy ka Hari, woy doka'g agpot to mgo maligaon no otow ²² su oglogparan sikandan to hari woy to Magboboot, woy dakol ka igkobaybadyari ran.

Duma Pad no mgo Igtuaro to mgo Mougsob

²³ Duma pad no mgo igtuaro to mgo mougsob soini:

Kono'n marodyow ko duon ogparapitan nu to poghusoy.

²⁴ Oggakatungadyawan woy ogdooton to mgo koot-otowan ka otow no ognangon duon to nakasao “Waro sao nu.” ²⁵ Di marodyow ka ogdatong duon to otow no ognangon no nakasao ka nakasao; dakol ka pogbolig no oglopow kandin.

²⁶ Unawa to harok ka kamaugotan no tabak.

²⁷ Hipongaa nu pa panoy ka tarabau nu duon to kamot woy kad on ogpos-ok to baoy nu. ²⁸ Doka'g pamaugot no nakasao ka songo baoy nu ko waro, woy doka'g gawoy pinabadyo to kagi nu. ²⁹ Doka'g nangon duon to goinawa nu “Ogsulian ku sikandin to pighimu rin koddi odyow no ogpokog-unug koy.”

³⁰ Pigligaran ku ka kamot to poguon no otow, woy pigligaran ku ka pinamua-an to otow no waro marodyow no pogdoromdom;

³¹ moon-ing on ka mgo dugi no nigtulin, nigmantulin ka lagut to tibon tano, woy nagugus on ka aad no batu.

³² Nigdoromdom a duon to goinawa ku to nakita ku, woy duon in-anad ku puun to nakita ku: ³³ Oghirogo ka to doisok, oghimooy ka to maupot, ogpangadyopkop ka ro to dagdagow to poghimooy ³⁴ woy oglopowan ka to pogkawaroi unawa to oglopow to takawon no ogtinugpu.

Duma Pad no mgo Igtuaro ni Solomon

25 ¹ Mgo duma pad no igtuaro ni Solomon soini no inpasulat ni Hisikia no hari to Juda to mgo otow rin:

² Ka poghoos to katagaanan ian ka kabantug to Magboboot woy ka pogbokad to sikan ian ka kabantug to mgo hari.

- ³ Unawa't katikangan to langit woy to karaoman to tano, kono ogkatogkad ka goinawa to mgo hari.
- ⁴ Woy on ogkohimu no alahas ka plata ko ogtunawon woy og-awoon ka lagod din: ⁵ woy on ogkapos-ok to pogkamatuarong ka pogboot to hari ko og-awoon pad panoy ka mgo dorooti no otow duon to tangkaan to hari.
- ⁶ Doka'g parakol-dakol to tangkaan to hari, woy doka'g pinnuu to longod no intagama tongod to mgo datu. ⁷ Madmarodyow ko ognangon ka hari to “Dii kad,” woy no ogkasiporan ka ko ogdatong ka datu no litos to sikan no pinnuuanan. Ko nokoy ka nakita to mgo mata nu ⁸ doka inangon magaan duon to husadyanan, su naugpa ogpasiporan ka to songobaoy nu to kaugadyan. ⁹ Ko ogpa-ap-apuoy kow to songobaoy nu, doka'g nangon to in-naas-naas no kinagian to duma no otow, ¹⁰ su ogpasiporan ka to otow no ogdinog to sikan, woy kono ogka-awo taman to katamanan ka maroot no ngaran nu.
- ¹¹ Unawa't dorodyawi no alahas no bulawan no pighimasaran to plata ka marodyow no kinagian to litos no allow. ¹² Unawa't dorodyawi no arikis no bulawan ka pogsapad to mougsob no otow duon to otow no ogpamminog to marodyow.
- ¹³ Unawa't maagsil no woig to guabung ka ogkasaligan no taagnangon duon to nigpa-aap kandin no ogpakabaghot to goinawa to mgo igbudyag din.
- ¹⁴ Unawa't kibol woy kaamag no kono ogtood og-uran ka otow no ogpangagikagi tongod to mgo igbogoy rin no kono din ogtooron pogbogoy.
- ¹⁵ Ogka-aap nu ka igbudyag ko kono ka no dagosu, woy agad ka makogal iing to bokog ogkagopu pinabadyo to maomu no kinagian.
- ¹⁶ Ko ogpakakita ka to tonob, litos-litosa nu ro ka ogkoonon nu su ko og-unguron nu ogpoko-ilib ka. ¹⁷ Songo doka'g maasia to pogpanumbaoy nu to songo baoy nu su ko og-unguron nu ogdomotan ka rin.
- ¹⁸ Unawa't baras, to kampilan woy to magaang no tunud ka otow no ogpamaugot to ubat tongod to songo baoy rin.
- ¹⁹ Unawa't maroot no ngipon woy to napulid no paa ka pogsandig duon to kono ogkasaligan no otow to allow to koirapan.

- ²⁰ Unawa't poghawi to kinabo to maagsil no allow woy unawa't pogsabuk to suka duon to pali ko og-uranda ki duon to otow no duon mabogat no goinawa.
- ²¹ Ko oggutasan ka usig nu, bogadyi nu sikandin to koonon. Ko ogkammaraan sikandin, bogadyi nu sikandin to woig no ogko-inom din. ²² Ko oghimu ka to sikan, ogpatunawon nu ka makogal no goinawa rin woy ogkadassagan ka to Magboboot.
- ²³ Unawa't duon uran ko ogkaamag to maagbot, duon ogkabou ko duon ogkagi to ogpakagawoy.
- ²⁴ Madmarodyow no og-ugpo ka no ogpasagsagboka duon to pinadyag¹woy to pog-ugpo nu to baoy duma to asawa no ungod ogpang-ogot.
- ²⁵ Unawa't maagsil no woig duon to goinawa no naaboy ka marodyow no nangnangonon puun to mariu no ugpaan.
- ²⁶ Unawa't lobog no sobsob woy unawa't pighiluan no sakoruanan ko duon matuarong no otow no ogpaugut to mgo tarabau to mgo dorooti no otow.
- ²⁷ Kono'n marodyow ko ogdakolon nu ka pogkoon to tonob, woy songo kono'n matuarong ko ogpamangho ka to kabantugan nu.
- ²⁸ Unawa't lunsud no waro marodyow no aad ko duon otow no kono ogpakaponod to pog-ugpo din.
- 26** ¹ Unawa to kono'n litos no ogmaagsil to guabung, woy ko og-uran to tinggaani, kono'n litos no ogtahuron ka angol-angol no otow.
- ² Unawa to madya no kono ogsagdok woy to kaugoy-lugoy no kono oglatun, kono og-utong ka tungadyow duon to otow no kono'n litos no ogtungadyawan.
- ³ Kono ogbabali ka kuddo woy ka asnu ko waro lampos woy ko waro bukaru woy songo kono ogbabali ka angol-angol no otow ko waro baras.
- ⁴ Doka'g tabak to angol-angol no otow pinabadyo to ka-angoan din, odyow no kono ka ogkohimu no angol-angol songo.
- ⁵ Tabaka nu ka angol-angol no otow tongod to ka-angoan din, odyow no kono ogdoromdom sikandin no mougsoob sikandin.

¹25: 9 Pinadyag: To Hibriu nignangon 'ugpo ka to ampow to atop' su nokani nighimu sikandan to pinadyag no sumptul to baoy ran duon to atop no kono'n masandig.

- ⁶ Iing to pigtampod nu ka paa nu woy unawa to nigpamudyu ka to kasakitan ko nigpa-aap ka to nangnangonon pinabadyo to angol-angol no otow.
- ⁷ Unawa to mgo paa to pulid no otow no waro dadyagang ka igtuario duon to bobo to angol-angol no otow.
- ⁸ Unawa to oghikotan nu ka batu duon to pintik ko ogtahuron nu ka angol-angol no otow.
- ⁹ Unawa to dugion no nagon-gonan to nalasing no otow ko duon igtuario duon to bobo to angol-angol no otow.
- ¹⁰ Unawa to ogpamano no otow no ogpakatausow ro duon to agad hontow ka otow no ogpatalabau to angol-angol no otow woy to otow no nigligad do.
- ¹¹ Unawa to asu no oglibong ogkoon to pig-ilob din, oglibong oghimu ka angol-angol no otow to ka-angoan no hinimuan din.
- ¹² Dakol-dakol ka ogko-im-imaan to angol-angol no otow woy to otow no mougsob to kandin do no pogpitow.
- ¹³ Okgagi ka poguon no otow to “Kono a oglibuwas, su duon mabuut no lion duon to kalasara no oghip-hipanow duon to mgo pagindaanan.”
- ¹⁴ Unawa to lokob duon to bisagra rin no ogwoil-woil di kono oghipanow, ogliid-liid ka poguon no otow duon to hibatanan din.
- ¹⁵ Igsood to poguon no otow ka boad din duon to padyo di kono din oghonaton poglibong to bobo din tongod to pogkapogul din!
- ¹⁶ Naan to poguon no otow no mougsob pad sikandin to papitu no otow no ogtabak to litos.
- ¹⁷ Unawa to otow no ogsakoow to talinga to asu ka otow no oghilabot to pogpo-og-ogotoy no waro labot din.
- ¹⁸ Unawa to angol no otow no nigpamano to niglogdog no tunud woy ko ogpakamatoy no tunud ¹⁹ ka otow no oggawoy to songobaoy rin mangkuwan ognangon “Liag do sikan!”
- ²⁰ Unawa't hapuy no ogkoobukan ko waro igtomog, ogkaparong ka pogpo-og-ogotoy ko waro ogwawangal.
- ²¹ Unawa to ogmoinit ka бага ko ogsabukan to uling woy unawa to oglogdog ka hapuy ko ogtomogan, ogpalogdog to kasamuk ka otow no magaan ogpo-og-ogotoy.

- ²² Unawa to managomnom no ngaap ka mgo kinagian to otow no ogtasob, woy ogsood sikan to diraom to otow.
- ²³ Unawa to og-alinoy to maroot no kuron ko duon marodyow no kinagian duon to bobo to otow no maroot so goinawa.
- ²⁴ Ogpatau no marodyow sikandin pinabadyo to kinagian ka otow no duon maroot no pogboot, di duon poggawoy to diraom to goinawa rin. ²⁵ Agad ko marodyow ka mgo kinagian din, doka'g tuu kandin, su naponu to karootan ka goinawa rin. ²⁶ Agad ko ogkohoos ka maroot no goinawa rin pinabadyo to poggawoy, ogkabokad ka karootan din to tangkaan to tibon koot-otowan.
- ²⁷ Ko ogkakali ka otow to tiklobu ogko-unoy sikandin ogkatiklobu; ko ogliiron to otow ka batu, ogko-unoy sikandin ogkaligpisan to sikan.
- ²⁸ Waro goinawa to otow duon to pigpasakitan din pinabadyo to pog-ubat, woy maroot ka oglopow tongod to pog-uug-uug to maroot no otow.

- 27** ¹ Doka'g parakol-dakol tongod to oghimuon nu asoom, su waro ka mataga ko nokoy ka oglopow to sikan no allow.
- ² Loin porom no otow ka ogsadyo koikow; kono'n sikoikow ro.
- ³ Mabogat ka mgo batu, woy moirap ogtiangon ka badyokbok, di mabmabogat to sikan ka igkosasow puun to angol-angol no otow.
- ⁴ Ogpaka-uang-uang ka langot woy mabogat ka moinit no goinawa di waro ogpakatangko to ogpanalikud.
- ⁵ Madmarodyow ka pogsapad to tangkaan to tibo woy to dakol no goinawa no inhoos.
- ⁶ Marodyow ka tuud to aukoy nu ko ogkasakitan ka rin, di gawoy ro ka mgo harok to usig nu.
- ⁷ Ogsamilian to naantoy no otow ka tonob, di agad ka mapoit inat moomis duon to otow no oggutasan.
- ⁸ Unawa to manuk-manuk no ogpamariu to saag din ka otow no ogpamariu to ugpaan din.
- ⁹ Ogmaawang ka goinawa ta ko ogpakangarog ki to moumut no poomut woy palina, woy songo ogmaawang ka goinawa ta ko duon marodyow no tambag to aukoy ta.
- ¹⁰ Doka'g iniugi ka aukoy nu woy ka aukoy to amoy nu woy kono ka oghondio to baoy to suod nu to allow to igkobaybadyari

- nu; madmarodyow ka aukoy no marani woy to suod no mariu to pog-ugpo.
- ¹¹ Anak, ogmougsob ka odyow no duon karago to goinawa ku, woy odyow no duon igkatabak ku to oglomot koddi.
- ¹² Ogpa-aput panoy ka otow no marodyow to pogdoromdom ko ogpakakita sikandin to koirapan no ogdatong, di ogparagas do duon ka otow no waro gindawanan woy ogkabaybadyaran sikandin.
- ¹³ Tinawaa nu ka kinabo no igpamaugot to otow no ogbadyaran din ka utang to dagpu, woy puruta nu ian ko oghimuon din to utang to agkadyon no boi.
- ¹⁴ Ko ogboligan nu ka songobaoy nu to maagbot to masoom pad lagboy, oggoramon din no pigtungadyawan nu sikandin.
- ¹⁵ Unawa to pogtuu-tuu to woig to uran-uran no allow no ogpoko-ulingol ka asawa no ungod ogpang-ogot; ¹⁶ kono ogkaponoran sikandin unawa to kaamag no kono ogkaponoran woy unawa to mantika no kono ogkakomkom.
- ¹⁷ Okgagaangan ka putow pinabadyo to putow woy ogkabagaan ka otow pinabadyo to otow.
- ¹⁸ Ogpakakoon to bogas to kadyu ka otow no og-udyamu to sikan no kadyu, woy ogkasadyo ka otow no og-udyamu to igbudyag din.
- ¹⁹ Unawa to ogkakitaan ka aung to otow duon to woig, ogkakitaan ka pogko-otow rin duon to goinawa rin.
- ²⁰ Kono ogkabuung ka kamatadyon woy ka lobonganan woy songo kono ogkabuung ka mgo mata to otow to pogpipitow.
- ²¹ Ogko-ol-oogan ka karodyowan to bulawan woy to plata pinabadyo to hapuy, di ogko-ol-oogan ka otow pinabadyo to pogsadyo no ogkatinawo din.
- ²² Agad ko ogbinadyuon nu ka angol-angol no otow duon to losung unawa to pogbinadyu to homoy, kono ogka-awo ka pogka-angol din.
- ²³ Doka'g kalingawi to pogpitow to mgo karniru nu, woy poomoti nu to pogbantoy to karodyowan to mgo kambing nu; ²⁴ hoo su kono ogpalinggaat ka saapi taman to katamanan, woy kono ogparagas ka pogko-igbudyag to katamanan to mgo tipouri. ²⁵ Ko oghakuton nu ka lagut no susungguroy to mgo adyam to tingkahagsil ²⁶ duon ogkapurut nu no bulbul puun to mgo nati no karniru no ogkohimu no mgo kinabo

now, woy ogkaduad nu ka mgo kambing no ogpakaboli ka to tano. ²⁷Woy duon pad gatas to kambing odyow to poghimu to sora no litos koikow, to lunggunan nu woy to mgo suguanon nu pad no mgo daaga.

- 28** ¹Ogpanlaguy ka dorooti no otow agad ko waro oggapon, di ogkounawa to lion no kono ogkahinaatan ka mgo matuarong no otow.
- ²Ko maligaon ka koot-otowan, moon-ing ka mgo igbudyag, di ogkatapid ka pog-ugpo ko duon igbudyag no ogpakasabut woy no duon katagaan.
- ³Unawa to uran no maagbot no ogpakadaat to mgo pinamua ka igbudyag no ogloig-loig to mgo otow no nawaraan.
- ⁴Ogsadyoon ka mgo dorooti no otow to mgo otow no nig-iniug to kasuguan, di og-atuan sikandan to mgo otow no ogtuman to kasuguan.
- ⁵Kono ogpakasabut to kohusoy ka mgo maroot no otow, di ogkasabutan lagboy sikan to mgo otow no ogpamangho to Magboboot.
- ⁶Madmarodyow ka nawaraan no otow no waro igkasawoy, woy to datu no ogsuwoy-suwoy to daan.
- ⁷Sagboka no anak no marodyow to pogdoromdom ka otow no ogtuman to mgo kasuguan, di ogkasiporan ka amoy to anak no ogdumaruma to mgo magolgol no otow.
- ⁸Ko ogkadatu ka otow pinabadyo to pogpatulin to dakol to mgo utang, oghondio ka saapi no piglimud din dio to otow no ogkoid-u to mgo nawaraan.
- ⁹Ogkarootan ka Magboboot to mgo pog-ampu to otow no kono ogpannalinga to kasuguan.
- ¹⁰Ogko-uug to kandin do no tiklobu ka otow no og-aap to mgo matuarong to daan to karootan, di marodyow ka ogko-im-imaan no ogtinawoon to mgo otow no waro igkasawoy.
- ¹¹Naan to datu no otow no mougsob sikandin, di ogpakakita ka nawaraan no otow no duon marodyow no pogsabut ko hondoi ka kono'n litos to datu.
- ¹²Ko ogpakarog ka mgo matuarong, moon-ing ka ogkukuus; di ko ogkohimu no mgo igbudyag ka mgo dorooti no otow ogmanghoos on ka mgo otow.

- ¹³ Kono ogtulin ka otow no oghoos to mgo sao din, di ogkoid-uan ka otow no og-abin woy og-ongkod to sikan.
- ¹⁴ Ogbaboligan ka otow no ungod ogkahallok to Magboboot, di ogkalopowan to igkobaybadyari ka otow no ogpamakogal to goinawa rin.
- ¹⁵ Unawa to lion^mno ogpamangho to ogdawion din, woy unawa to osoⁿno nabou ka dorooti no otow no ogboboot to nana-adyu-adyu no koot-otowan.
- ¹⁶ Kono'n marodyow ka pogdoromdom to igbudyag no ogloig-loig to mgo otow rin, di ogmaadyat ka ukul to otow no ogdomot to saapi no ogpuun to kono'n litos no pogpurut.
- ¹⁷ Waro ogbulig porom to otow no nakabunu, odyow no ogpalingaat sikandin to pogsondit woy ogpalpalaguy taman to kamatadyon din.
- ¹⁸ Ogbabantadyan ka otow no waro igkosawoy, di ogkasaligkat to magaan ka otow no ogsuwoy-suwoy to daan.
- ¹⁹ Ogbabuung to pogkoon ka otow no mabasuk ogkakamot to tano din, di ka otow no ungod do oghinampot to igkaratui rin ogkabuung do to igkwaroi!
- ²⁰ Ogbaboligan lagboy ka otow no ogkasaligan, di ogkalogparan ka otow no ungod ogpamangho to daan no ogpakadatu kandin to magaan.
- ²¹ Kono'n marodyow ko duon ogparapitan ta to poghusoy, di duon mgo otow no oghimu to kono'n litos tongod do su ogbogadyan to sagboka no pogkoon.
- ²² Ungud ogdoromdom ka logoron no otow no ogkaruonan sikandin porom, di waro sikandin mataga no ogdoog sikandin to pogkwaroi.
- ²³ To kaugadyan dakol-dakol ka kabantug to otow no ogsapad to duma rin, woy to otow no ungod do oghuu-huu.
- ²⁴ Unawa to otow no taaggugus ka otow no ogtakow puun to amoy woy inoy rin no ognangon "Kono'n sao sikan."
- ²⁵ Ian ogbunsud to pogpo-og-ogotoy ka magolgol no otow, di ogtulin ka otow no ogsalig to Magboboot.

^m28:15 Lion: Dakol no adyam soini duon to koilawan no unawa't meow pitawon di malmaintok naan do to kuddo. Ogpakahimatoy to otow soini no ogdawion din.

ⁿ28:15 Oso: Songo mabuut no magintaunan soini no iing to laku pitawon, di unawa to karakolan to dakol no babuy.

²⁶ Angol-angol ka otow no ogsalig to kandin do no doromdom, di ogkakaasagan ka otow no oghipanow to daan to kougsoban.

²⁷ Kono ogkawaraan ka otow no ogbogoy duon to mgo nawaraan, di moon-ing ka tungadyow no ogtinawoon to otow no opakabutud to pogpitow kandan.

²⁸ Ogmanghoos ka mgo otow ko ogkohimu no igbudyag ka mgo dorooti no otow; di ko ogkamatoy ka mgo dorooti no otow ogmatubung ka mgo otow no matuarong.

29 ¹ Ko ogpalinggaat no makogal ka uu to otow agad ko pigsaparan sikandin to kapila, inogo on no ogkagugus ka pog-ugpo din no konad ogkoulian.

² Ogkukuus ka mgo otow ko matubung ka pog-ugpo to mgo matuarong, di og-auhoy ka mgo otow ko ogkohimu no mgo igbudyag ka mgo dorooti no otow.

³ Ogkarago ka amoy to otow no duon dakol no goinawa to kougsoban, di ogdaraaton ka saapi din to otow no ogdumaruma to mgo agkadyon no boi.

⁴ Ogmadigon ka nasud ko mahusoy ka pog-aap to hari, di ogkaguak ka nasud ko hagamhagamon ka hari to mgo saapi no opakapasuwoy to husoy.

⁵ Iing to ogtoon to lit-ag to mgo paa rin ka otow no og-uug-uug to songobaoy rin.

⁶ Ogkalit-agan ka otow no maroot pinabadyo to kandin do no mgo sao, di ogpaka-uuranda woy ogkukuus ka otow no matuarong.

⁷ Duon goinawa to mgo matuarong no otow no ogkabogadyan ka mgo nawaraan to litos no husoy, di inbaagad do sikan to mgo dorooti no otow.

⁸ Ian binunsuran to kasamuk to lunsud ka mgo taagsuy-at, di ogpohibow to moinit no goinawa ka mgo mougsob no otow.

⁹ Ko ogtangko ka mougsob no otow to angol-angol no otow duon to husadyanan, ogbabansagon woy ogsuy-at ka angol-angol no otow woy ogpalinggaat ka kasamuk.

¹⁰ Ogdomotan to mgo taagmangadyow ka otow no waro igkasawoy, di ogkapangabangan sikandin to mgo matuarong.

¹¹ Ogpouwangan to angol-angol no otow ka tibo no ingkaangoti rin, di ogponoron to mougsob no otow ka dilo din.

- 12 Ogmohimu no maroot ka tibon mgo duon katondanan ko ogpamminog ka igbudyag dan to mgo ubat.
- 13 Nig-uunawa ro ka nawaraan no otow woy ka otow no nigloig-loig to duma rin su nigpuun to Magboboot ka kaadyag to mgo mata ran.
- 14 Ko litos ka poghusoy to sagboka no hari to mgo otow no nawaraan, ogpalinggaat no madigon ka pogboboot din no waro katamanan.
- 15 Ogmougsob ka bato ko ogbarasan sikandin ko ogpakasao, di ko ogbaagaron ka bato to poghimu to noiniatan din, ogkasiporan ka inoy rin.
- 16 Ogdakol ka sao ko ogtulin ka mgo dorooti no otow, di ogpakakita ka mgo matuarong to pogkapood dan.
- 17 Ko ogsaparan nu ka anak nu, ogkabogadyan ka rin to ka-awangan; igkarago ian ka igbogoy rin to goinawa nu.
- 18 Waro kohusoy to koot-otowan ko waro inpapitow dio to kohuna-an, di ogkaboligan ka otow no ogtood to kasuguan.
- 19 Kono ogkasaparan ka suguanon pinabadyo do to pogkagi; agad ko ogkasabutan din, kono din ogpamminogon.
- 20 Dakol-dakol ka ogko-im-imanan to angol-angol no otow woy to otow no ogkagi no waro din panadya doromdoma.
- 21 Ko ogpaag-akaran nu ka tibo no ogkoiniatan to suguanon nu puun to baubato pad sikandin, to kaugadyan ogbaybadyaran ka rin.
- 22 Ian binunsuran to kasamuk ka otow no ungod ogkabou, woy moon-ing ka mgo sao to otow no magaan ogmoinit so goinawa rin.
- 23 Ogdadoisok ka otow no ogparakol-dakol, di ogkabantug ka otow no ogpasaad-saad.
- 24 Og-usigon din ka kandin do no pog-ugpo ka otow no ogbulig to takawon; agad ko ogpapanguliboton sikandin to pogkagi to litos, kono ogpakalangub sikandin to pognangon.
- 25 Ogdalit-ag ka otow no ogkahallok do to mgo otow, di ogkakaasagan ka otow no ogsalig duon to Magboboot.
- 26 Moon-ing ka ogpabulig to igbudyag, di ka Magboboot do ian ka ogpakabogoy to litos no husoy.
- 27 Ogdomotan to mgo matuarong ka mgo ogsuwoy-suwoy; songo og-usigon to mgo dorooti no otow ka mgo matul-id.

Mgo Kinagian ni Agur

30¹ Soini ka mgo kinagian to Magboboot pinabadyo ki Agur no anak ni Yaki no ingkakagi rin ki Itiil woy ki Ukal^o. ² Kagi rin to “Waro katagaanan ku unawa to duma no mgo otow; kono a ogpakasabut unawa to otow. ³ Waro a makapurut to kougsoban, woy waro katagaanan ku tongod to In-oog no Magboboot.

⁴ Hontow ka nakapanoik to langit no nigpamanoug man do?

Hontow ka nakakomu to kaamag to boad din? Hontow ka naka-abon to mgo dagat duon to kinabo din? Hontow ka nigpos-ok to katamanan to tano? Hontow ka ngaran din woy ka ngaran to anak din? Nangoni a nu ko nataga ka!

⁵ Waro maroot no naka-amut to mgo kinagian to Magboboot; sikandin ka kaasag to tibo no og-aput kandin. ⁶ Doka'g timuli ka kandin no mgo kinagian, su ogsaparan ka rin woy ipoitaga rin no ubaton ka.

⁷ Daruwa ka ogbudyuon ku koikow Magboboot; doka a nu ligaa to kono a pad ogkamatoy; ⁸ An-anadyan, ipamariu nu koddi ka mgo ubat woy poggawoy; igkorangob, doka a nu bogadyi to pogkawaraan woy to pogkadatu, bogadyi a nu ro to ogkoonon ku allow-allow. ⁹ Hoo su ko ogkaruonan a og-iniugan ku sikoikow woy ognangon a to 'Hontow ka Magboboot?' woy ko ogkawaraan a naugpa ogpanakow a no ogligsoman ku ka ngaran to Magboboot ku.

¹⁰ Doka'g kagi to maroot tongod to sagboka no suguanon duon to igbudyag din, su ogkatungadyawan ka rin, woy ogkabaybadyaran ka ian.

¹¹ Duon mgo otow no ogtungadyow to mgo amoy ran woy no kono ogpabolid to mgo inoy ran; ¹² woy duon mgo otow no naan dan no malinis sikandan dokad di waro pad na-awo ka pogkamaligsom dan. ¹³ Songo duon mgo otow no ogparakol-dakol to pogpitow ran no igdoisok dan to pogpitow ka mgo duma ran, ¹⁴ woy duon mgo otow no ogkounawa to mgo mabuut no magintaunan no magaang to ngipon unawa to mgo kampilan; ogkoonon

^o30:1 Itiil woy Ukal: To duma no hokad nigdoromdom sikandan no kono'n mgo ngaran to otow soini, ko kono'n kinagian no ogpasabut “Naaboy a Magboboot woy waro ogkohimu ku.”

dan ka mgo otow no nawaraan woy og-awoon dan ka mgo nana-adyu-adyu.

¹⁵ Daruwa ka anak to limatok. Ungud og-umow sikandan to “Bogadyi a, bogadyi a!”

Tatou ka kono ogkabung, hop-at ka kono ogkagi to “Litos on!”

¹⁶ An-anadyan ka lobonganan, igkorangob ka aanakan no kono ogpaka-anak, igkatou ka tano no kono ogkabung to uran woy igkohop-at ka hapuy no kono ogkagi to “Litos on!”

¹⁷ Okgatuktukan to uwak ka mata to otow no ogsuy-at to amoy rin, woy ogkoonon to mandadawi no manuk-manuk ka mata to otow no ogsamili to pogpanalinga to inoy rin.

¹⁸ Tatou ka igkohinaatan ku, hop-at ka kono kud ogkasabutan:

¹⁹ an-anadyan ka daan to banug duon to aw-awangan, igkorangob ka daan to uod duon to daama, igkatou ka daan to barku duon to taliwaro to dagat, woy igkohop-at ka daan to lukos duma to daaga.

²⁰ Soini ka oghimuon to agkadyon no boi: ogkoon sikandin woy ogpunasan din ka bobo din woy ogkagi sikandin to 'Waro nohimu ku no sao.'

²¹ Tatou ka ogpaka-antog to kalibutan, hop-at ka kono din ogkagoon: ²² an-anadyan ka suguanon no igkohimu no hari, igkorangob ka angol-angol no otow no naantoy-haantoy lagboy, ²³ igkatou ka boi no duon iglukos di kono'n indakoli to goinawa rin, woy igkohop-at ka suguanon no daaga no ogpakasoip to igbudyag din no boi.

²⁴ Duon hop-at to kalibutan no maintok di mougsob lagboy:

²⁵ an-anadyan ka mgo makut no kono'n manokal lagboy, di to guabung oglimuron dan panadya ka ogkoonon dan, ²⁶ igkorangob, ka mgo badyir^pno maintok do ka dadyagang dan, di ogpaka-ugpo sikandan to batuon, ²⁷ igkatou ka mgo taangas no waro hari, di matapid ka poghipanow ran, ²⁸ woy ka igkohop-at ka tiki no ogkapurut to boad ta ro, di ogkakitaan pad duon to dagdakol no mgo baoy to hari.

²⁹ Tatou ka mabogat-bogat ko oghipanow sikandan, hop-at ka matigpos to pogwoil-woil: ³⁰ an-anadyan ka lion^qno mabantug to tibon mgo adyam no kono og-ituos to tangkaan

P30:26 Badyir; waro soini no adyam to Pilipinas; ogko-un-unawa to laku.

^q30:30 Lion: dakol no adyam soini duon to koilawan no unawa't meow pitawon di malmaintok naan do to kuddo. Ogpakahimatoy to otow soini no ogdawion din.

to agad nokoy, ³¹ igkorangob ka lumansad no ogpo-ial-ial ko oghipanow, igkatou ka lukosan no kambing, woy igkohop-at ka hari no oghipanow duma to mgo sundau rin. ³² Ko nigpa-angol-angol ka no nigparakol-dakol, woy ko nigbabantaan ka to karootan, sagponga nu ka bobo nu to boad nu! ³³ Hoo su unawa to oglibuwas ka linanoy ko ogguligawon ka gatas, woy unawa rod no oglibuwas ka langosa ko ogpinguson ka irong, oglibuwas ian ka pogpo-og-ogotoy ko ogkahinggat ka igkabou to mgo otow.

Mgo Kinagian ni Hari Limuil

31 ¹ Mgo kinagian soini ni Hari Limuil^r– mgo igtuaro no in-anad to inoy rin: ² “Anak ku, Anak to aanakan ku, Anak to ingpangulibot ku ³ doka'g daata ka dadyagang nu duon to mgo boi, woy ka kanokal nu duon to ogpakagugus to pogboboot to mgo hari.

⁴ Kono'n litos to mgo hari, Limuil, ko og-inom sikandan to binu, woy ko ogko-ibogan to mgo igbudyag ka ogpakalasing, ⁵ hoo su ko og-inom sikandan ogkalingawan dan ka innangon to kasuguan, woy kono ogkabogadyan ka mgo pigloig-loig to litos no husoy ran.

⁶ Ian nu bogadyi to ogpakalasing ka magaan ogkabigtawi, woy bogadyi nu to binu ka ogmasakit so goinawa. ⁷ Og-inom sikandan woy ogkalingawan dan ka pogkawaraan dan woy konad ogdoromdomon dan ka igmasakit to goinawa ran.

⁸ Kagi ka to pogkaasag to mgo otow no kono ogpakakaasag to kandan do no pog-ugpo, woy pangabangi nu ka tibo no waro ogkohimu. ⁹ Kagi ka woy litosa nu ka pogboboot; kaasagi nu to poghusoy ka mgo nawaraan woy mgo noirapan.”

Ka Marodyow no Asawa

¹⁰ Hontow ka ogpakapamangho to maungangon no igboi? Madmarodyow pad lagboy sikandin to mgo mahalon no mgo batu.^s ¹¹ Ogkasaligan lagboy sikandin to iglukos din, woy waro igkoilu-i to lukos. ¹² Marodyow ka igbogoy to sikan no boi duon to lukos, kono'n karootan, to tibon mgo

^r31:1 Limuil: naogpa igkorangob no ngaran ni Hari Solomon soini.

^s31:10 Mahalon no mgo batu: to English 'rubies', mgo maddodyow no malaab no batu soini no ogkohimu no alahas.

allow to ukul din. ¹³ Og-aam sikandin to dilana^twoy linu^uno ogpamakuton din to poghahabol. ¹⁴ Unawa sikandin to mgo barku no ogpanghakut to pogkoon puun to mariu. ¹⁵ Masoom pad to kono pad ogsilo ka allow og-onow sikandin; oghilutu sikandin to koonon to mgo anak din woy mgo taad^vto mgo suguanon din no boi. ¹⁶ Og-aam sikandin to sagboka no kamot woy ogbolion din; ogpamua sikandin to pinamua-an to ubas pinabadyo to kandin do no saapi. ¹⁷ Ogpoomot sikandin to tibon tarabau rin, woy manokal ka mgo boad din to mgo oghulingonon din. ¹⁸ Ogbantadyan din no ogtulin ka pogduruad din, woy kono ogko-obukan ka ilawan din to maukilom. ¹⁹ Ogtitingkal sikandin pinabadyo to boad din, woy oghimuon din ka sinulid to mgo kudyamoy rin. ²⁰ Og-ot-otawon din ka mgo nawaraan woy ogbuligan din ka mgo noilu-an. ²¹ To tinghagsil kono din ogkasasawan ka lunggunan din su duon pighimu rin taan no maddodyow no kinabo kandan tibo. ²² Duon marodyow no mgo uoson to hibatanan din; woy ogpakasau-ub sikandin to maddodyow no mgo manggad no pighimu rin. ²³ Ogtahuron ka iglukos din duon to gomawan to lunsud ko ogpinnuu sikandin dio duma to mgo igbudyag to mgo ugpaan. ²⁴ Oghimu ka maungangon no boi to mgo kinabo no linu woy ogduaron din pad, sikandin ka oghimu to mgo hoon no ogbaligyoon to mgo tindaahan. ²⁵ Insau-ub din ka dadyagang woy ka kabantug; waro igkasasow rin ko ogdoromdomon din ka ogdatong no mgo allow. ²⁶ Mougsoob ka mgo kinagian din, woy litos ka mgo igtuario no ignangon-nangon din. ²⁷ Ogbantadyan din ka mgo tarabau to lunggunan din, woy kono ogpin-pinnuu ro sikandin. ²⁸ Oghasindog ka mgo anak din no ogsadyo kandin; songo ogsadyoon sikandin to iglukos din no kagi: ²⁹ “Moon-ing ka mgo boi no maungangon ka oghimuon dan, di labow ka to kandan tibo.” ³⁰ Ogpakagawoy ka marodyow no pogpangagi-kagi, woy ogligad do ka marodyow no langlanguan, di ogkasadyo ka boi no duon kahallok duon to

^t31:13 Dilana: to English 'wool', bulbul to karniru soini no marodyow to pogpanabol
^u31:13 Linu: 'flax' to English, sagboka no pinamua soini no ogkagamit to pogpanabol
 iing to abaka.

^v31:15 Taad: to duma no hokad mgo tarabau no oghimuon dan.

Magboboot. ³¹ Ogbogadyan porom sikandin to dassag din,
woy ogkasadyo porom sikandin duon to gomawan to lunsud
tongod to mgo hinimuan din.